

Namo tassa bhagavato arahato sammāsambuddhassa

Samyuttanikāye

Khandhavaggaṭikā

1. Khandhasamyuttam

1. Nakulapituvaggo

1. Nakulapitusuttavaṇṇanā

1. Bhaggā nāma jānapadino rājakumārā. Tesam nivāso ekopi janapado ruḥhīvasena “bhaggā” tveva vuccatīti katvā vuttam “**evamṇāmake janapade**” ti, evam bahuvacanavasena laddhanāme” ti attho. **Tasmiṃ vanasaṇḍeti** yo pana vanasaṇḍo pubbe miḡānaṃ abhayatthāya dinno, tasmiṃ vanasaṇḍe. Yasmā so gahapati tasmiṃ nagare “nakulapitā” ti puttassa vasena paññāyittha, tasmā vuttam “**nakulapitā**” ti nakulassa nāma dārakassa pitāti attho. Bhariyāpissa “nakulamātā” ti paññāyittha.

Jarājijṇoti jarāvasena jijṇo, na byādhiādīnaṃ vasena jijṇo. **Vayovuḍḍhoti** jijṇattā eva vayovuḍḍhippattiyā vuḍḍho, na sīlādivuḍḍhiyā. Jātiyā mahantatāya cirarattatāya **jātimahallako**. **Tiyaddhagatoti** paṭhamo majjhimo pacchimoti tayo addhe gato. Tattha paṭhamam dutiyañca atikkantattā pacchimaṃ upagatatā **vayoanuppatto**. **Āturakāyoti** dukkhavedanāpavisatāya anassādakāyo. Gelaññaṃ pana dukkhagatikanti “**gilānakāyo**” ti vuttam. Tathā hi **saccavibhaṅge** (vibha. 190 ādayo) dukkhasaccaniddese dukkhaggahaṇeṇeva gahitattā byādhi na niddiṭṭho. **Niccapaggharaṇatthenāti** sabbadā asucipaggharaṇabhāvena. So panassa āturabhāvenāti āha – “**āturaṃyeva nāmā**” ti. **Visesenāti** adhikabhāvena. Āturaṭīti āturo. Saṅgāmapatto santattakāyo. Jarāya āturaṭā **jarāturaṭā**. Kusalapakkhavaḍḍhanena mano bhāventīti **manobhāvanīyā**. Manasā vā bhāvanīyā sambhāvanīyāti **manobhāvanīyā**. **Anusāsātūti** anu anu sāsātūti ayamettha atthoti āha – “**punappunam sāsātū**” ti. **Aparāparam** pavattitam hitavacanam. **Anotiṇṇe vatthusmiṃ** yo evam karoti, tassa ayam guṇo dosoti vacanam. **Tantivasenāti** tantisannissayena ayam anusāsanī nāma. **Pavenīti** tantiyā eva vevacanam.

Aṇḍam viya bhūtoti adhikopamā kāyassa aṇḍakosato abaladubbalabhāvato. Tenāha “**aṇḍam hī**” tiādi. **Bāloyeva** tādisattabhāvasamaṅgī muhuttampi ārogyam paṭijānanto.

Vippasannānīti pakatimākāram atikkamitvā visesena pasannāni. Tenāha – “**suu pasannānī**” ti. Pasannacittasamuṭṭhitarūpasampadāhi tāhi tassa mukhavaṇṇassa pārisuddhīti āha – “**parisuddhoti niddoso**” ti. Tenevāha “**nirupakkilesatāyā**” tiādi. Etenevassindriyavippasannatākāraṇampi samvaṇṇitanti daṭṭhabbam. **Esa** mukhavaṇṇo. **Nayaggāhapaññā kiresāti** idam anāvajjanavaseneva vuttabhāvam sandhāya.

Yam neva puttassātiādi “ovadatu no, bhante, bhagavā yathā mayam paralokepi aññamaññaṃ samāgaccheyyāmā” ti vuttavacanam sandhāya vuttameva. **Madhuradhammadesanāyeva** satthu sammukhā paṭiladdhā, tassa attano pemaḡaravagahitattā “**amatābhiseko**” ti **veditabbo**.

Idam padadvayam. **Ārakattā kilesehi** maggena samucchinnattā. **Anayeti** avaḍḍhiyam, anattheti attho. **Anaye** vā anupāye. **Na iriyanato** avattanato. **Ayeti** vaḍḍhiyam atthe upāye ca. **Araṇiyatoti** payirupāsītabbato. Niruttinayena padasiddhi veditabbā purimesu atthavikappesu, pacchime pana

saddasatthavasenapi. Yadipe ariyasaddo “ye hi vo ariyā parisuddhakāyakammantā” tiādīsu (ma. ni. 1.35) visuddhāsaya payogesu puthujjanesu viṭṭati, idha pana ariyamaggādhigamena sabbalokuttarabhāvena ca ariyabhāvo adhippetoti dassento āha – “**buddhā cā**” tiādi. Tatha **paccekabuddhā tathāgatasāvaka ca sappurisā**ti idam “ariyā sappurisā” ti idha vuttapadānam attham asaṅkarato dassetuṃ vuttam. Yasmā pana nippariyāyato ariyasappurisabhāvā abhinnaabhāvā, tasmā “**sabbeva vā**” tiādi vuttam.

Ettāvata hi buddhasāvako vutto, tassa hi ekantena kalyāṇamitto icchitabbo parato ghosamantarena paṭhamamaggassa anuppajjanato. Visesto cassa bhagavāva “kalyāṇamitto” ti adhippeto. Vuttañhetam “mamañhi, ānanda, kalyāṇamittam āgama jātidhammā sattā jātiyā parimuccanti” tiādi (sam. ni. 1.129; 5.2). So eva ca aveccapasādādhigamena dalhabhatti nāma. Vuttampi cetam “yam mayā sāvakanam sikkhāpadam paññattam, tam mama sāvaka jīvitahetupi nātikkamanti” ti (udā. 45; cūlava. 385). **Kataññutādihi paccekabuddhabuddhāti** ettha kataṃ jānātīti kataññū. Kataṃ viditam pākātam karotīti katavedī. Paccekabuddhā hi anekesu kappasatasahassesu kataṃ upakāram jānanti, katañca pākātam karonti satijananaāmisapaṭiggahañādinā. Tathā saṃsāradukkhadukkhittassa sakkaccam karonti kiccām, yam attanā kātuṃ sakkā. Sammāsambuddho pana kappānam asaṅkhyeyyasahassesu kataṃ upakāram maggaphalānam upanissayañca jānanti, pākātañca karonti. Sīho viya ca evam sabbattha sakkaccameva dhammadesanam karontena buddhakkiccām karonti. Yāya paṭipattiyā ariyā diṭṭhā nāma honti, tassā appaṭipajjanam, tatha ca ādarābhāvo **ariyanam adassanasilatā, na ca dassane sādhu-kāritā**ti veditabbā. **Cakkhunā adassāvī**ti ettha cakkhu nāma na maṃsacakkhu eva, atha kho dibbacakkhupīti āha “**dibbacakkhunā vā**” ti. **Ariyabhāvoti** yehi yogato “ariyā” ti vuccanti, te maggaphaladhammā daṭṭhabbā.

Tatrāti nānadassanasseva dassanabhāve. **Vatthūti** adhippetatthañāpanakāraṇam. **Evam vuttepi** evam aññāpadesena attupanāyikam katvā vuttepi. **Dhammanti** lokuttaradhammam, catusaccadhammam vā. **Ariyakaradhammā** aniccānupassanādayo, vipassiyamānā vā aniccādayo, cattāri vā ariyasaccāni.

Avinītoti na vinīto adhisīlasikkhādīnam vasena na sikkhito. Yesam saṃvaravinayādīnam abhāvena ayam “avinīto” ti vuccati, te tāva dassetuṃ “**duvidho vinayo nāmā**” tiādimāha. Tatha **sīlasamvaroti** pātimokkhasamvaro veditabbo, so ca atthato kāyikavācasiko avītikamo. **Satisamvaroti** indriyārakkhā, sā ca tathāpavattā satiyeva. **Ñānasamvaroti** “sotānam samvaram brūmī” ti (su. ni. 1041) vatvā “paññāyete pidhīyare” ti (su. ni. 1041) vacanato sotasaṅkhātānam taṇhādīṭṭhiduccaritaavijjāvasiṭṭhakilesānam samvaro pidahanam samucchedaññanti veditabbam. **Khantisamvaroti** adhivāsana, sā ca tathāpavattā khandhā, adoso vā, “paññā” ti keci vadanti. **Vīriyasamvaro** kāmavitakkādīnam vinodanavasena pavattam vīriyameva. Tena tena āgena tassa tassa āgassa pahānam **tadaṅgappahānam**. Vikkhambhanavasena pahānam **vikkhambhanappahānam**. Sesapadattayepi eseva nayo.

Iminā pātimokkhasamvarenātiādi sīlasamvarādīnam vivaraṇam. Tatha **samupetoti iti**-saddo ādiattho. Tena “upagato” tiādinā **vibhaṅge** (vibha. 511) āgataṃ samvaravibhaṅgam dasseti. **Kāyaduccaritādīnanti** dussīlyasaṅkhātānam kāyavacīduccaritādīnam muṭṭhasaccasaṅkhātassa pamādassa, abhijjhādīnam vā akkhantiaññākosajjānañca. **Samvaraṇatoti** pidahanato, **vinayanatoti** kāyavācācittānam virūpapavattiyā vinayanato, kāyaduccaritādīnam vā apanayanato, kāyādīnam vā jimhapavattim vicchindivā ujukanayanatoti attho. Paccayasamavāye uppajjanārahānam kāyaduccaritādīnam tathā tathā anuppādanameva samvaraṇam vinayanañca veditabbam.

Yam pahānanti sambandho. “**Nāmarūpaparicchedādīsu vipassanāññāpesū**” ti kasmā vuttam? Nanu nāmarūpaparicchedapaccayapariggahakaṅkhāvitaraṇāni na vipassanāññāṇāni sammasanā-kārena appavattanato? Saccametam, vipassanāññāṇassa pana adhiṭṭhānabhāvato evam vuttam. Nāmarūpamattamidaṃ, “natthi ettha attā vā attaniyam vā” ti evam pavattaññam **nāmarūpavavattānam**. Sati vijjamāne khandhapañcakasaṅkhāte kāye, sayam vā satī tasmim kāye

diṭṭhi **sakkāyadīṭṭhi**, sā ca “rūpaṃ attato samanupassatī”ti evaṃ pavattā attadīṭṭhi. Tassa nāmarūpassa kammāvijjādipaccayapariggaṇhanañāṇaṃ **paccayapariggaho**. “Natthi hetu, natthi paccayo sattānaṃ saṃkilesāyā”tiādinayappavattā **ahetudīṭṭhi**. “Issarapurisapajāpatipakatiaṇukālādīhi loko pavattati nivattati cā”ti tathā tathā pavattā diṭṭhi **visamahetudīṭṭhi**. **Tassevāti** paccayapariggahasseva. **Kaṅkhāvitaraṇenāti** yathā etarahi nāmarūpassa kammādipaccayato uppatti, evaṃ atīte anāgatepīti tīsu kālesu vicikicchāpanayanañāṇena. **Kathaṃkathībhāvassāti** “ahosiṃ nu kho ahaṃ atītamaddhāna”ntiādinayappavattāya (ma. ni. 1.18; saṃ. ni. 2.20) saṃsayappavattiyā. **Kalāpasammasanenāti** “yaṃ kiñci rūpaṃ atītānāgatapaccuppanna”ntiādinā (saṃ. ni. 3.48-49) khandhapañcakaṃ ekādasasu okāsesu pakkhipitvā sammasanavasena pavattena vipassanāñāṇena. **Ahaṃ mamāti gāhassāti** “attā attaniya”nti gahaṇassa. **Maggāmaggavavattānenāti** maggāmaggañāṇavisuddhiyā. **Amagge maggasaññāyāti** amagge obhāsādike “maggo”ti uppannasaññāyā. Yasmā sammadeva saṅkhārānaṃ udayaṃ passanto “evamete saṅkhārā anurūpakāraṇato uppajjanti, na pana ucchijjantī”ti gaṇhāti, tasmā vuttaṃ “**udayadassanena ucchedadīṭṭhiyā**”ti. Yasmā pana saṅkhārānaṃ vayaṃ “yadipime saṅkhārā avicchinā vattanti, uppannuppannā pana appaṭisandhikā nirujjhantevā”ti passato kuto sassataggāho. Tasmā vuttaṃ “**vayadassanena sassatadīṭṭhiyā**”ti. **Bhayadassaneni** bhayatūpaṭṭhānañāṇena. **Sabhayeti** sabbabhayānaṃ ākarabhāvato sakaladukkhavūpasamasāṅkhātassa paramassāsassa paṭipakkhabhāvato ca sabhaye khandhapañcake. **Abhayaññāyāti** “abhayaṃ khema”nti uppannasaññāyā. **Assādasāññā** nāma pañcupādānakkhandhesu assādanavasena pavattasaññā, yo “ālayābhiniveso”tipi vuccati. **Abhiratisāññā** tattheva abhiramaṇavasena pavattasaññā, yā “nandī”tipi vuccati. **Amuccitukāmatā** ādānaṃ. **Anupekkhā** saṅkhārehi anibbindanaṃ, sālayatāti attho. **Dhammaṭṭhitiyaṃ** paṭiccasamuppāde. **Paṭilomabhāvo** sassatucchedaggāho, paccayākārapaṭicchādakamoho vā. **Nibbāne ca paṭilomabhāvo** saṅkhāresu nati, nibbānapaṭicchādakamoho vā. **Saṅkhāranimittaggāhoti** yādisassa kilesassa appahīnatā vipassanā saṅkhāranimittāṃ na muñcati, so kilesa, yo “saṃyogābhiniveso”tipi vuccati, **saṅkhāranimittaggāhassa**, atikkamanameva vā **pahānaṃ**.

Pavatti eva **pavattibhāvo**, pariyaṭṭhānanti attho. **Nivaraṇādiddhammānanti ādi**-saddena nīvaraṇapakkhiyā kilesā vitakkavicārādayo ca gayhanti. Catunnaṃ ariyamaggānaṃ bhāvitattā accantaṃ appavattibhāvena yaṃ pahānanti sambandho. Kena pana pahānanti? “Ariyamaggehevā”ti viññāyamānoyamatto tesāṃ bhāvitattā appavattivacanaṃ. “**Samudayapakkhikassā**”ti ettha cattāropi maggā catusaccābhisaṃmayāti katvā tehi pahātabbena tena tena samudayasāṅkhātena lobhena saha pahātabbattā samudayasabhāvattā ca. **Saccavibhaṅge** ca sabbakilesānaṃ samudayabhāvassa vuttattā “samudayapakkhikā”ti diṭṭhiādayo vuccanti. **Paṭipassaddhattaṃ** vūpasantatā.

Saṅkhatanissaṭatā saṅkhārasabhāvābhāvo. **Pahīnasabbasaṅkhatanti** virahitasabbasaṅkhatāṃ, viśaṅkhānanti attho. Pahānañca taṃ vinayo cāti **pahānavinayo** purimena atthena. Dutiyena pana pahīyatīti pahānaṃ, tassa vinayoti yojetabbo.

Bhinnasaṃvarattāti naṭṭhasaṃvarattā, saṃvarābhāvototi attho. Tena asamādinnaṃsaṃvaropi saṅgahitova hoti. Samādanena hi sampādetabbo saṃvaro, tadabhāve na hotīti. **Ariyeti** ariyo. Paccattavacanañhetāṃ. **Esseti** eso eso, atthato anaññoti attho. **Tajjātet** atthato taṃsabhāvo, sappuriso ariyasabhāvo, ariyo ca sappurisaṅgahitoti attho.

So ahanti attanā parikkappitaṃ attānaṃ diṭṭhigatiko vadati. “Ahaṃbuddhinibandhanaṃ attā”ti hi attavādino laddhi. **Advayanti** dvayatārahitāṃ. Abhinnaṃ vaṇṇameva “accī”ti gahetvā “accīti vaṇṇo evā”ti tesāṃ ekattaṃ passanto viya yathāparikkappitaṃ attānaṃ “rūpa”nti, yathādiṭṭhaṃ vā rūpaṃ, “attā”ti gahetvā tesāṃ ekattaṃ passanto daṭṭhabbo. Ettha ca “rūpaṃ attā”ti imissā pavattiyā abhāvepi rūpe attaggahaṇaṃ pavattamānaṃ acciyaṃ vaṇṇaggahaṇaṃ viya “advayadassana”nti vuttaṃ. Upamāyo ca anaññattādigahaṇanidassanavaseneva vuttā, na vaṇṇādīnaṃ viya attano vijjamaṇadassanattaṃ. Na hi attani sāmibhāvena rūpañca sakiñcanabhāvena samanupassati. **Attani vā rūpanti** attānaṃ rūpassa sabhāvato ādhāraṇabhāvena. **Rūpasmim vā attānanti** rūpassa attano ādhāraṇabhāvena diṭṭhipassanāya

passati. **Pariyuṭṭhaṭṭhāyīti** pariyuṭṭhānappattāhi diṭṭhitaṇhāhi “rūpaṃ attā, rūpavā attā”tiādinā khandhapañcakaṃ micchā gahetvā tiṭṭhanato. Tenāha “**pariyuṭṭhānākārenā**”tiādi. **Eseva nayoti** yo “idhekacco rūpaṃ attato samanupassati”tiādinā rūpakkhandhe vutto saṃvaṇṇanāyayo, vedanākkhandhādīsipi eso eva nayo veditabbo.

Suddharūpamevāti arūpena amissitaṃ kevalaṃ rūpameva. **Arūpanti** suddhaarūpaṃ rūpassa aggahitattā. **Catūsu khandhesu tiṇṇaṃ tiṇṇaṃ vasesanāti** catūsu khandhesu tiṇṇaṃ tiṇṇaṃ gahaṇavasena rūpārūpamissako attā kathito tasmim̐ tasmim̐ gahaṇe vedanādivinimuttaarūpadhamme kaṣiṇarūpena saddhim̐ sabbarūpadhamme ca ekajjhaṃ gahaṇasiddhito. **Pañcasu ṭhānesu ucchedadiṭṭhi kathitā**, te te eva dhamme “attā”ti gahaṇato tesañca ucchedabhāvato. Avasesesu pana pannarasasu ṭhānesu rūpaṃ “attā”ti gahetvāpi diṭṭhigatiko tattha niccasaññaṃ na vissajjeti kaṣiṇarūpena taṃ missetvā tassa ca uppādādīnaṃ adassanato, tasmāssa tatthapi hotiyeva **sassatadiṭṭhi** ekaccasassatagāhavasenapi. **Maggāvaraṇā** viparītadassanato. **Na saggāvaraṇā** akammaṭṭhappattatāya. Akiriyāhetukanatthikadiṭṭhiyo eva hi kammaṭṭhadiṭṭhiyo.

Kāyoti rūpakāyo. So **āturoyeva** asavasabhāvato. **Rāgadosamohānugatanti** appahīnarāgadosamohasantāne pavattaṃ. **Idhāti** imasmim̐ sutte. **Dassitaṃ** āturabhāvena. **Nikkilesatāyāti** sayāṃ pahīnakilesasantānagatatāya. **Sekhā neva āturacittā** pahīnakilese upādāya, appahīne pana upādāya āturacittā. **Anāturacittatāmyeva bhajanti** vaṭṭānusārimahājanassa viya tesāṃ cittassa kilesavasena āturattābhāvato.

Nakulapitusuttavaṇṇanā niṭṭhitā.

2. Devadahasuttavaṇṇanā

2. Devā vuccanti rājāno “dibbanti kāmaguṇehi kīḷanti laḷanti, attano vā puññānubhāvena jotantī”ti katvā. Tesāṃ dahoti **devadaho**. Sayāṃjāto vā so hoti, tasmāpi “**devadaho**”ti vutto. **Tassa avidūre nigamo “devadaha”ntveva saṅkhaṃ gato** yathā “varaṇānagaraṃ, godhāgāmo”ti. Pacchābhūmiyaṃ aparadisāyaṃ niṅṭṭhajanapado pacchābhūmaṃ, taṃ gantukāmā **pacchābhūmagamikā. Te sabhāreti** te bhikkhū therassa vasena sabhāre kātukāmatāya. Yadi thero tesāṃ bhāro, therassapi te bhārā evāti “**te sabhāre kātukāmatāyā**”ti vuttaṃ. Evañhi thero te ovadītabbe anusāsītabbe maññatīti. Idāni tamatthaṃ vivaranto “**yo hī**”tiādimāha. **Ayaṃ nibbhāro nāma** kañci puggalaṃ attano bhāraṃ katvā avattanato.

Catubbidhenāti dhātukosallaṃ āyatanakosallaṃ paṭiccasamuppādakosallaṃ ṭhānāṭṭhānakosallanti evaṃ catubbidhena.

Te mahallakābhādhikātidaharapuggale gaṇhitvāva gacchati. Te hi divasadvayena vūpasantaparissamā eva. **Hatthivānaratittirapaṭibaddhaṃ vatthum kathetvā. “Eḷakāḷagumbeti** kālāṭiṇagacchamaṇḍape”tipi vadanti.

Vividhaṃ nānābhūtaṃ rajjaṃ virajjaṃ, virajjameva **verajjaṃ**, tattha gataṃ, paradesagatanti attho. Tenāha “**ekassā**”tiādi. **Cittasudattādayoti** cittaḡahapatianāthapiṇḍikādayo. **Vīmaṃsakāti** dhammavicāraḡā. **Kinti** kīdisaṃ. **Dassananti** siddhantaṃ. **Ācikkhati** kīdisanti adhippāyo. **Dhammassāti** bhagavatā vuttadhammassa. **Anudhammanti** anukūlaṃ avirujjhanadhammaṃ. So pana veneyyajjhāsāyānurūpadesanāvīthāroti āha – “**vuttabyākaraṇassa anubyākaraṇa**”nti. Dhāreti attano phalanti **dhammo**, kāraṇanti āha – “**sahadhammikoti sakāraṇa**”ti. **Imināpi** pāṭhantarena **vādo eva dīpito**, na tena pakāsītā kiriyā.

Taṇhāvaseneva channampi padānaṃ **attho veditabbo**. Yasmā rāḡādayo taṇhāya eva avatthāvisesāti. Tenāha “**taṇhā hī**”tiādi. Vihananti kāyaṃ cittañcāti **vighāto**, dukkhanti āha –

“**avighātoti nidukkho**”ti. Upāyāseti upatāpetīti upāyāso, upatāpo. Tappaṭipakkho pana **anupāyāso nirūpatāpo** daṭṭhabbo. **Sabbatthāti** sabbavāresu.

Devadahassuttavaṇṇanā niṭṭhitā.

3. Hāliddikānisuttavaṇṇanā

3. “Avantidakkhiṇāpathe”ti aññesu suttapadesu āgatattā āha “**avantidakkhiṇāpathasaṅkhāte**”ti. Majjhimadesato hi dakkhiṇadisāya avantiraṭṭhaṃ. Pavattayittha ettha laddhīti **pavattaṃ**, pavattitabbaṭṭhānanti āha “laddhipavattaṭṭhāne”ti. Rupanāsabhāvo dhammoti katvā **rūpadhātūti rūpakkhandho** vutto. **Rūpadhātumhi** ārammaṇapaccayabhūtena **rāgena** sahaajātenapi asahaajātenapi upanissayabhūtena appahīnabhāveneva **vinibaddhaṃ** paṭibaddhaṃ **kammaviññāṇaṃ**. **Okasārīti** vuccati – “tasmim rūpadhātusaññite oke sarati pavattatī”ti katvā. Avati ettha gacchati pavattatīti **okaṃ**, pavattiṭṭhānaṃ. Tenāha – “**gehasārī ālayasārī**”ti.

Ugacchati vā ettha vedanādīhi saddhiṃ samavetīti **oko**, cakkhurūpādi. **Paccayoti** ārammaṇādivasena paccayo. **Paccayo hotīti** anantarasamanantarādīnā ceva kammūpanissayaārammaṇādīnā ca. “Viññāṇadhātu kho, gahapatī”ti evaṃ vutte “kammaviññāṇavipākaviññāṇesu kataraṃ nu kho”ti **sammoho bhaveyya**. **Tassa** sammohassa **vighātattaṃ** apagamanaṭṭhaṃ. **Asambhinnāvāti** asaṃkiṇṇāva desanā katā. **Ārammaṇavasena catasso abhisāṅkhāraviññāṇaṭṭhitiyo vuttā** – “rūpupayaṃ vā, bhikkhave, viññāṇaṃ tiṭṭhamānaṃ tiṭṭheyya, rūpārammaṇa”ntiādīnā (saṃ. ni. 3.53). **Tā** viññāṇaṭṭhitiyo **dassetumpi**.

Daḷhaṃ abhinivesavasena ārammaṇaṃ upentīti **upayā**, taṇhādīṭṭhiyo. **Adhiṭṭhānabhūtāti** patiṭṭhānabhūtā. **Abhinivesabhūtāti** taṃ taṃ ārammaṇaṃ abhinivissa ajjhosāya pavattiyā kāraṇabhūtā. **Anusayabhūtāti** rāgānusayadiṭṭhānusayabhūtā. **Uparimakoṭiyāti** pahānassa uparimakoṭiyā. Buddhānaññeva hi te savāsānā pahīnā. Pubbe aggahitaṃ viññāṇaṃ aggahitamevāti katvā kasmā idha desanā katāti codeti – “**idha viññāṇaṃ kasmā gahita**”nti. Pubbe “viññāṇadhāturāgavinibandhaṅca viññāṇa”nti vuccamāne yathā yathā sammoho siyā paccayapaccayuppannavibhāgassa dukkarattā, idha pana sammohassa okāsova natthi avisesena pañcasu khandhesu kilesappahānavasena. Tenāha “**kilesappahānadassanatta**”ntiādī. **Kammaviññāṇena okaṃ asarantenā**”ti itthambhūtalakkhaṇa kāraṇavacanaṃ. **Asarantenāti** anupagacchantena.

Paccayaṭṭhenāti ārammaṇādipaccayabhāvena. **Nimittaṃ** uppattikaṃ. **Ārammaṇa...pe...** **niketanti** ārammaṇakāraṇasaṅkhātena nivāsaṭṭhānabhūtena rūpameva niketanti rūpanimittaniketam.

Chandarāgassa balavadubbalatāyāti ajjhattakhandhapañcake chandarāgassa balavabhāvena taṃ “oko”ti, bahiddhā chasu ārammaṇesu tassa dubbalatāya tāni “niketa”nti vuttāni. Idāni yathāvuttamatthaṃ pākaṭaṃ katvā dassetuṃ “**samānepi hī**”tiādī vuttaṃ. **Okoti vuccati** gehameva rattiṭṭhānabhāvato. **Niketanti vuccati** uyyānādi divaṭṭhānabhāvato. **Tato dubbalataro hoti** chandarāgo.

Gehassitasukhenāti gehanissitena cittassa sukkena **sukhito** sukhattatto **hoti**. **Kiccakaraṇīyesūti** khuddakesu ceva mahantesu ca kattabbaṭṭhesu. **Sayanti** attanā. **Antoti** cittajjhāsaye.

Evaṃrūpoti idisarūpo. Vaṇṇasaddo viya rūpasaddo rūpāyatanassa viya saṅghānassapi vācakoti adhippāyena “**dīgharassa kālodātādīsu rūpesū**”ti vuttaṃ. **Sukhādīsūti** somanassādīsū. Tattha hi “abhiṇhaṃ somanassito bhaveyya”nti patthanā siyā. **Evaṃsañño nāmāti** visayavasena saññāvisesapatthanamāha. **Evaṃviññāṇoti** pana idha visayamukhena viññāṇavisesapatthanam vadati – “evaṃnipuṇarūpadassanasamatthaṃ, evaṃpañcapasādapaṭimaṇḍitanissayaṅca me viññāṇaṃ bhaveyyā”ti.

Vaṭṭaṃ purato akurūmānoti loke cittaṃ apatthento. **Asiliṭṭhaṃ** pubbenāparaṃ asambaddhaṃ. Vadanti etenāti **vādo**, dosoti āha – “**tuyhaṃ doso**”tiādi. **Idheva** imasmiṃyeva samāgame. **Nibbeṭhehi** dosato attānaṃ mocehi.

Hāliddikānisuttavaṇṇanā niṭṭhitā.

4. Dutiyahāliddikānisuttavaṇṇanā

4. Cūlachakkapañheti mūlapaṇṇāse cūlaṭaṇhāsāṅkhayasutte (ma. ni. 1.390 ādayo). **Mahāsakkapañhepi** mahāṭaṇhāsāṅkhayasuttepi (ma. ni. 1.396 ādayo). **Etanti** “ye te samaṇabrāhmaṇā”tiādisuttapadaṃ. Taṇhā sammadeva khīyati etthāti **taṇhāsāṅkhayo**, asaṅkhatā dhātūti āha “**taṇhāsāṅkhaye nibbāne**”ti. **Antaṃ atikkantaṇiṭṭhāti** antarahitaniṭṭhā. Tenāha “**satataniṭṭhā**”ti. **Sesapadesūti** “accantayogakkhemino”tiādīsu.

Dutiyahāliddikānisuttavaṇṇanā niṭṭhitā.

5. Samādhisuttavaṇṇanā

5. Samādhīti appanāsamādhī, upacārasamādhī vā. **Kammaṭṭhānanti** samādhīpādakaṃ vipassanākammaṭṭhānaṃ. “Phātiṃ gamissatī”ti pāṭho. **Patthetīti** “aho vata me īdisaṃ rūpaṃ bhaveyyā”ti. **Abhivadatīti** taṇhādiṭṭhivasena abhinivesaṃ vadati. Tenāha “**tāya abhinandanāyā**”tiādi. “Aho piyaṃ iṭṭha”nti vacībhede asatīpi tathā lobhuppāde sati abhivadatiyeva nāma. Tenāha “**vācaṃ abhindanto**”ti. “Mama ida”nti attano pariṇāmetvā anaññagocaraṃ viya katvā gaṇhanto **ajjhosāya tiṭṭhati** nāmāti dassento āha “**gilitvāti pariniṭṭhapetvā gaṇhātī**”ti. “Abhinandatī”tiādayo pubbhāgavasena vuttā, “uppajjati nandī”ti dvārappattavasena. Paṭhamehi padehi anusayo, pacchimeṇa pariyuṭṭhānanti keci “gahaṇaṭṭhena upādāna”nti katvā. **Nābhinandatī nābhivadatīti** ettha heṭṭhā vuttavipariyāyena attho vedītabbo. **Na “iṭṭhaṃ kanta”nti vadatīti** “iṭṭha”nti na vadati, “kanta”nti na vadati. **Nābhivadatiyeva** taṇhāya anupādiyattā.

Samādhisuttavaṇṇanā niṭṭhitā.

6. Paṭisallāṇasuttavaṇṇanā

6. Nātvā āhāti “sati kāyaviveke cittaviveko, tasmīṃ sati upadhiviveko ca imesaṃ laddhuṃ vaṭṭatī”ti nātvā āha.

Paṭisallāṇasuttavaṇṇanā niṭṭhitā.

7. Upādāparitassanāsuttavaṇṇanā

7. Gahaṇena uppannaṃ paritassananti khandhapañcake “ahaṃ mamā”ti gahaṇena uppannaṃ taṇhāparitassanaṃ diṭṭhiparitassanañca. **Aparitassananti** paritassanābhāvaṃ, paritassanapaṭipakkaṃ vā. **Ahu vata metaṃ** balayobbanādi. **Kammaviññānanti** vipariṇāmārammaṇaṃ taṇhādiṭṭhisahagataṃ viññānaṃ tadanuvatti ca. **Anuparivatti** nāma taṃ ārammaṇaṃ katvā pavatti. Tenāha “**vipariṇāmārammaṇacittato**”ti. **Akusaladhammasamuppādāti** taṇhāya aññākusaladhammasamuppādā. **Pariyādiyivāti** khepetvā, tassa pavattitūṃ okāsaṃ adatvā. **Sauttāsoti** taṇhādiṭṭhivasena sauttāso. **Gaṇhitvāti** taṇhādiṭṭhiggāhehi gahetvā tesañceva vasena **paritassako**. **Rūpabhedānuparivatti** cittaṃ na hoti. **Vaṭṭatīti** sabbākārena vattūṃ yuttanti attho.

Upādāparitassanāsuttavaṇṇanā niṭṭhitā.

8. Dutiyupādāparitassanāsuttavaṇṇanā

8. **Taṇhāmānadiṭṭhivasena desanā katā** “etaṃ mama, esohamasmi, eso me attā”ti desanāya āgatattā. **Catūsu suttesūti** pañcamādīsu catūsu suttesu. Catutthe pana vivaṭṭameva kathitaṃ.

Dutiyupādāparitassanāsuttavaṇṇanā niṭṭhitā.

9. Kālattayaaniccasuttavaṇṇanā

9. Yadi atītānāgataṃ etarahi natthibhāvato aniccaṃ, paccuppannampi tadā natthīti **ko pana vādo** tassa aniccatāya, **paccuppannamhi kathāva kā** udayabbayaparicchinnattā tassa. Vuttañhettaṃ “nibbattā ye ca tiṭṭhanti, āragge sāsapūpamā”ti (mahāni. 10).

Kālattayaaniccasuttavaṇṇanā niṭṭhitā.

10-11. Kālattayadukkhasuttādivaṇṇanā

10-11. **Tathārūpenevāti** yathārūpeneva puggalajjhāsayena navamaṃ suttaṃ kathitaṃ, tathārūpenevāti. Te kira bhikkhū atītānāgataṃ “dukkha”nti sallakkhetvā, tathā “anattā”ti sallakkhetvā paccuppanne kilamiṃsu. “Atha nesa”ntiādi sabbamaṃ heṭṭhā vuttanayena vattabbaṃ.

Kālattayadukkhasuttādivaṇṇanā niṭṭhitā.

Nakulapituvaggavaṇṇanā niṭṭhitā.

2. Aniccavaggo

1-10. Aniccādisuttavaṇṇanā

12-21. **Pucchāvasikaṃ** ānandattherassa pucchāvasena desitattā.

Aniccādisuttavaṇṇanā niṭṭhitā.

Aniccavaggavaṇṇanā niṭṭhitā.

3. Bhāravaggo

1. Bhārasuttavaṇṇanā

22. Upādānānaṃ ārammaṇabhūtā khandhā **upādānakkhandhā. Parihārabhāriyaṭṭhenāti** parihārasa bhāriyabhāvena garutarabhāvena. Vuttameva atthaṃ pākaṭaṃ kātuṃ “**etesañhi**”tiādimāha. Tattha yasmā etāni ṭhānagamanādīni rūpārūpadhammānaṃ paṅgulajaccandhānaṃ viya aññamaññūpassayavasena ijjhanti, na paccekaṃ, tasmā “etesa”nti avisesavacanaṃ kataṃ. **Puggalanti** khandhasantānaṃ vadati. Khandhasantāno hi avicchedena pavattamāno yāva parinibbānā khandhabhāraṃ vahanto viya loke khāyati tabbinimuttassa sattassa abhāvato. Tenāha “**puggalo**”tiādi. **Bhārahāroti jātoti** bhārahāro nāma jāto.

Punabbhavakaraṇaṃ punabbhavo, taṃ phalaṃ arahati, tattha niyuttāti vā **ponobhavikā. Tabbhāvasahagataṃ** yathā “sanidassanā dhammā”ti, na saṃsaṭṭhasahagataṃ, nāpi ārammaṇasahagataṃ. “Tatra tatrā”ti yaṃ yaṃ uppattiṭṭhānaṃ, rūpādiārammaṇaṃ vā patvā

tatratatrābhinandinī. Tenāha “**upapattiṭṭhāne vā**”tiādi. **Pañcakāmaguṇikoti** pañcakāmaguṇārammaṇo. Rūpārūpūpapattibhave rāgo **rūpārūpabhavarāgo. Jhānanikanti** jhānasāṅkhāte kammabhavave rāgo. **Sassatādiṭṭhīti** bhavadiṭṭhi, taṃsahagato rāgo. **Ayanti** rāgo **bhavataṇhā nāma. Ucchedadiṭṭhi** vibhavadiṭṭhi nāma, taṃsahagato chandarāgo **vibhavataṇhā nāma. Esa** puggalo khandhabhāram **ādiyati** taṇhāvasena paṭisandhiggahaṇato. “Asesametta taṇhā virajjati palujjati nirujjhati pahīyati”tiādinā sabbapadāni nibbānavaseneva veditabbānīti āha “sabbam nibbānasseva vevacana”nti.

Bhārasuttavaṇṇanā niṭṭhitā.

2. Pariññasuttavaṇṇanā

23. Parijānitabbeti pahānapariññāya parijānitabbe. Tathā parijānanañca tattha chandarāgappahānaṃ, tesam atikkamoti āha “**samatikkamitabbeti attho**”ti. **Accantapariññanti** nibbānaṃ vadati. Tenāha “**samatikkamanti attho**”ti.

Pariññasuttavaṇṇanā niṭṭhitā.

3. Abhijānasuttavaṇṇanā

24. Nātapariññā kathitā “abhivisiṭṭhāya paññāya jānana”nti katvā. **Dutiyapadenāti** “parijāna”nti padena. **Tatīyacatutthehīti** “virājayam pajaha”nti padehi.

Abhijānasuttavaṇṇanā niṭṭhitā.

4-9. Chandarāgasuttādivaṇṇanā

25-30. Dhātusamyutte vuttanayeneva veditabbāni, kevalaṅhi ettha khandhavasena desanā āgatā, tattha dhātuvasenāti ayameva viseso. **Cattāri saccāni kathitāni** assādādīnavanissaraṇavasena desanāya pavattattā.

Chandarāgasuttādivaṇṇanā niṭṭhitā.

10. Aghamūlasuttavaṇṇanā

31. Agham vuccati pāpaṃ, aghanimittatāya **agham** dukkham. Idaṅhi dukkham nāma visesato pāpahetukam kammaphalasaññitam. Tathā vaṭṭadukkham avijjātaṇhāmūlakattā. Aghassa nimittatāya agham dukkham. Vaṭṭānusārī mahājano hi dukkhābhībhūto tassa patikāram maññamāno taṃ taṃ karotīti.

Aghamūlasuttavaṇṇanā niṭṭhitā.

11. Pabhaṅgusuttavaṇṇanā

32. Pabhijjanasabhāvanti khaṇe khaṇe pabhaṅgusabhāvaṃ.

Pabhaṅgusuttavaṇṇanā niṭṭhitā.

Bhāravaggavaṇṇanā niṭṭhitā.

4. Natumhākaṃvaggo

1. Natumhākaṃsuttavaṇṇanā

33. Chandarāgappahānenāti tappatibaddhassa chandarāgassa pajahanena. Dabbādi pākatikaṭiṇaṃ pākaṭamevāti apākaṭaṃ dassetuṃ **tālanāḷikerādi** dassitaṃ, tiṇakaṭṭhānaṃ vā bhedadassanattamaṃ. **Piyālo** phārusakaṃ.

Natumhākaṃsuttavaṇṇanā niṭṭhitā.

3. Aññatarabhikkhusuttavaṇṇanā

35. Yadi rūpaṃ anusetīti rūpadhamme ārabba yadi rāgādayo anusayanavasena pavattanti. **Tena saṅkhaṃ gacchatīti** tena rāgādinā taṃsamaṅgīpuggalo saṅkhātabbataṃ “ratto duṭṭho”tiādinā voharītabbataṃ upagacchatīti. Tenāha “**kāmarāgādisū**”tiādi. **Abhūtenāti** ajātena anusayavasena appavattena. Anusayasīsena hettha abhibhavaṃ vadati. Yato “**ratto duṭṭho mūlhoti saṅkhaṃ na gacchatī**”ti vuttaṃ. Nippariyāyato hi maggavajjhakilesā anusayo.

Aññatarabhikkhusuttavaṇṇanā niṭṭhitā.

4. Dutiyaaññatarabhikkhusuttavaṇṇanā

36. Taṃ anusayitaṃ rūpanti taṃ rāgādinā anusayitaṃ rūpaṃ marantena anusayena anumarati. Tena vuttaṃ “**na hī**”tiādi. **Yena anusayena** marantena taṃ **anumarati**. **Tena saṅkhaṃ gacchatīti** tathābhūtato tena “ratto”tiādivohāraṃ labhati. **Yena anusayena** kāraṇabhūtena **anumiyati**, tena.

Dutiyaaññatarabhikkhusuttavaṇṇanā niṭṭhitā.

5-6. Ānandasuttādivaṇṇanā

37-38. Ṭhitiyā ṭhitikkhaṇena sahitaṃ **ṭhitaṃ. Ṭhitassa aññathattanti** uppādakkhaṇato aññathābhāvo. **Paññāyati**ti upalabbhati. Paccayavasena dharamānattā eva **jīvamānassa** jīvitindriyavasena **jarā paññāyati** uppādakkhaṇato aññathattappattiyā. Vuttameva atthaṃ pākaṭataraṃ kātuṃ “**ṭhiti**”tiādi vuttaṃ. **Jīvi...pe... nāmaṃ**. Tathā hi **abhidhamme** (dha. sa. 19) “āyu ṭhiti”ti niddiṭṭhaṃ. Aññathattanti jarāya nāmanti sambandho.

Tiṇi lakkhaṇāni honti saṅkhatasabhāvalakkhaṇato. **Yo koci** rūpadhammo vā arūpadhammo vā lokiyo vā lokuttaro vā **saṅkhāro. Saṅkhāro, na lakkhaṇaṃ** uppādādisabhāvattā. **Lakkhaṇaṃ, na saṅkhāro** uppādādirahitattā. **Na ca...pe... sakkā** saṅkhāradhammattā lakkhaṇassa. **Nāpi lakkhaṇaṃ vinā saṅkhāro** paññāpetuṃ sakkā saṅkhārabhāvena. Tenāha “**lakkhaṇenā**”tiādi. Idāni yathāvuttamatthaṃ upamāya vibhāvetuṃ “**yathā**”tiādimāha. Tattha **lakkhaṇanti** kāḷarattasabalādi bhāvalakkhaṇaṃ pākaṭaṃ hoti “ayaṃ asukassa gāvī”ti.

Evam saṅkhāropi paññāyati sabhāvato upadhārentassa uppādalakkhaṇampi uppādāvattathāti katvā. **Kālasaṅkhātoti** uppajjamānakālasaṅkhāto. **Tassa** saṅkhārassa. **Khaṇopīti** uppādakkhaṇopi paññāyati. **Uppādotīti** uppādalakkhaṇopi. **Jarālakkhaṇanti** uppannajīraṇalakkhaṇaṃ, taṃ “ṭhitassa aññathatta”nti vuttaṃ. “Bhaṅgakkhaṇe saṅkhāropi taṃlakkhaṇampi kālasaṅkhāto tassa khaṇopi paññāyati”ti pāṭho. Keci pana “jarāpī”ti padampettha pakkhipanti. Evañca vadanti “na hi tasmim khaṇe taruṇo hutvā saṅkhāro bhijjati, atha kho jīyamāno mahallako viya jīṇṇo eva hutvā bhijjati”ti, bhaṅgeneva pana jarā abhibhuyyati khaṇassa atittarabhāvato na sakkā paññāpetuṃ ṭhitiyāti tesam

adhippāyo. **Tānī**ti arūpadhammānaṃ tīṇi lakkhaṇāni. **Atthikkhaṇanti** arūpadhammavijjamānakkhaṇaṃ, uppādakkhaṇanti adhippāyo. **Sabbadhammānanti** sabbesaṃ rūpārūpadhammānaṃ ʘitiyā na bhavitabbaṃ. **Tassevā**ti tassā eva ʘitiyā. **Tamatthanti** jarālakkaṇassa paññāpetuṃ asakkuṇeyyabhāvaṃ. Aññe pana “santativasena ʘhānaṃ ʘhitī”ti vadanti, tayidaṃ akāraṇaṃ aʘṭhānaṃ. **Yasmā sutte** “ʘhitassa aññathattaṃ paññāyati”ti uppādavayehi nibbisesena ʘitiyā jotitattā. Yaṃ panettha vattabbaṃ, taṃ heʘṭhā vuttameva. Apica yathā dhammassa uppādāvattāya bhinnā bhaṅgāvattā icchitā, aññathā uppajjamānameva bhijjati āpajjati, evaṃ bhaṅgāvattāyapi bhinnā bhaṅgābhimukhāvattā icchitabbā. Na hi abhaṅgābhimukho bhijjati. Na cettha sakkā uppādābhimukhāvattā parikappetuṃ tadā tassa aladdhattalābhattā. **Ayaṃ visesoti** ʘhitikkhaṇo nāma rūpadhammānaṃyeva, na arūpadhammānanti ayaṃ īdiso viseso. **Ācariyamati** nāma tasseva ācariyassa mati, sā sabbadubbalāti āha “**tasmā**”tiādi.

Ānandasuttādivaṇṇanā niʘṭhitā.

7-10. Anudhammasuttādivaṇṇanā

39-42. Apāyadukkhe sakalasaṃsāradukkhe ca patituṃ adatvā dhāraṇaʘṭṭhena dhammo, maggaphalanibbānāni. Tadanulomikā cassa pubbabhāgapaʘipadāti āha “**dhammānudhammapaʘipannassā**”tiādi. “Nibbidābahulo”ti aʘṭhakathāyaṃ paduddhāro kato, pāḷiyaṃ pana “nibbidābahulaṃ vihareyyā”ti āgataṃ. **Ukkaṇṭhanabahuloti** sabbabhavesu ukkaṇṭhanabahulo. **Tīhi pariññāhī**ti nātatīraṇappahānapariññāhi. **Parijānātī**tebhūmakadhamme paricchijja jānāti, vipassanaṃ ussukkāpeti. **Parimuccati** sabbasaṃkilesato “maggo pavattito parimuccati”ti vuttattā. **Tathāti** iminā ito paresu tīsu maggo hotīti dasseti. **Idhāti** imasmiṃ sutte. **Aniyamītāti** aggahitā. **Tesu niyamītā** “aniccānupassī”tiādivacanato. **Sāti** anupassanā. **Tattha niyamitavasenevāti** idaṃ lakkhaṇavacanāṃ yathā “yadi me byādhayo bhavēyyuṃ, dātabbamidamosadha”nti. Na hi sakkā etissā eva anupassanāya vasena sammāsanaṅcāraṃ matthakaṃ pāpetunti.

Anudhammasuttādivaṇṇanā niʘṭhitā.

Natumhākaṃvaggavaṇṇanā niʘṭhitā.

5. Attadīpavaggo

1. Attadīpasuttavaṇṇanā

43. Dvīhi bhāgehi āpo ettha gatāti dīpo, dīpo viyāti dīpo oghehi anajjhottharaṇiyatāya. Yo paro na hoti, so attā, idha pana dhammo adhippeto. Attā dīpo etesanti **attadīpā**. Paʘisaraṇattho dīpaʘṭṭhoti āha – “**attasaraṇāti idaṃ tasseva vevacana**”nti. **Lokiyalokuttaro dhammo attā nāma** ekantanāthabhāvato. Paʘthamena padena vutto eva attho dutiyapadena vuccatīti vuttaṃ “**tenevāhā**”tiādi. Yavati etasmā phalaṃ pasavatīti **yoni**, kāraṇaṃ. Kiṃ pabhuti uppattiʘṭṭhānaṃ etesanti **kiṃ pabhutikā**. **Pahānadassanaṭṭhaṃ āraddhaṃ**. Tenevāha “**pubbe ceva...pe... te pahiyanti**”ti. Na **paritassati** taṇhāparittāsassa abhāvato. **Vipassanaṅgenāti** vipassanaṅsaṅkhātena kāraṇena.

Attadīpasuttavaṇṇanā niʘṭhitā.

2. Paʘipadāsuttavaṇṇanā

44. Sabhāvatosanto vijjamāno kāyo rūpādidhammasamūhoti **sakkāyoti** āha – “**sakkāyo dukkha**”nti. Diʘṭṭhi eva samanupassanā, diʘṭṭhisahitā vā samanupassanā **diʘṭṭhisamanupassanā**,

diṭṭhimaññanāya saddhiṃ itaramaññanā. **Saha vipassanāya catumaggañāṇaṃ samanupassanā** “catunnaṃ ariyasaccānaṃ sammadeva anurūpato passanā”ti katvā.

Paṭipadāsuttavaṇṇanā niṭṭhitā.

3. Aniccasuttavaṇṇanā

45. Virāgo nāma maggo, vimuttiṭṭhalanti āha – “**maggakkhaṇe virajjati, phalakkhaṇe vimuccati**”ti. **Aggahetvā**ti evaṃ nirujjhamānehi āsavehi “ahaṃ mamā”ti kañci dhammaṃ anādiyitvā. “Cittaṃ virattaṃ, vimuttaṃ hoti”ti vuttattā phalaṃ gayhati, “khīṇā jāti”tiādinā paccavekkhaṇāti āha “**saha phalena paccavekkhaṇadassanatta**”nti. **Upaṃ kattabbakiccābhāvena ṭhitaṃ**. Tenāha “**vimuttattā ṭhita**”nti. Yaṃ **pattabbaṃ**, taṃ aggaphalassa **pattabhāvena** adhigatattā **santuṭṭhaṃ** parituṭṭhaṃ.

Aniccasuttavaṇṇanā niṭṭhitā.

4. Dutiyaaniccasuttavaṇṇanā

46. **Pubbantaṃ** atītakhandhakoṭṭhāsaṃ. **Anugātā**ti sassatādīni kappetvā gahaṇavasena anugātā. **Aṭṭhārasa diṭṭhiyoti** catasso sassatadiṭṭhiyo, catasso ekaccasassatadiṭṭhiyo, catasso antānantikadiṭṭhiyo, catasso amarāvikkhepadīṭṭhiyo, dve adhiccasamuppannadiṭṭhiyoti evaṃ aṭṭhārasa diṭṭhiyo na honti paccayaghātena. **Aparantanti** anāgataṃ khandhakoṭṭhāsaṃ sassatādibhāvaṃ kappetvā gahaṇavasena anugātā. Soḷasa saññīvādā, aṭṭha asaññīvādā, aṭṭha nevasaññīnāsaññīvādā, satta ucchedavādā, pañca paramadiṭṭhadhammanibbānavādāti evaṃ **catucattālīsa diṭṭhiyo na honti** paccayaghātena. Sassatadiṭṭhithāmaso ceva sīlabbatadiṭṭhiparāmāso ca na hoti paccayaghātena. Tenāha “**ettāvata paṭhamamaggo dassito**”ti anavasesadiṭṭhipahānakittanato. **Pahīnā** vikkhambhitā. **Idaṃ panāti** “rūpasmi”ntiādi.

Dutiyaaniccasuttavaṇṇanā niṭṭhitā.

5. Samanupassanāsuttavaṇṇanā

47. **Paripuṇṇagāhavasenāti** pañcakkhandhe asesetvā ekajjhaṃ “attā”ti gahaṇavasena. **Etesaṃ** pañcannaṃ upādānakkhandhānaṃ **aññataraṃ** “attā”ti samanupassanti. **Itīti** evaṃ. **Yassa** puggalassa **ayaṃ** attadiṭṭhisānkhatā samanupassanā **atthi** paṭipakkhena avihatattā saṃvijjati. **Pañcannaṃ indriyānanti** cakkhādīnaṃ indriyānaṃ.

Ārammaṇanti kammaviññāṇassa ārammaṇaṃ. Mānavasena ca diṭṭhivasena ca “asmī”ti gāhe sījjhante taṃsahagatā taṃhāpi taggahitāva hotīti vuttaṃ “**taṇhāmānadiṭṭhivasena asmīti evampissa hoti**”ti. **Gahetvā**ti ahaṃkāravatthivasena gahetvā. **Ayaṃ ahamasmīti** ayaṃ cakkhādiko, sukhādiko vā ahamasmi. “Rūpī attā arogo paraṃ maraṇā”ti evamādigahaṇavasena pavattanato vuttaṃ “**rūpī bhavissantiādīni sabbāni sassatameva bhajanti**”ti. Vipassanābhīnivesato pubbe yathevākārāni pañcindriyāni, **atha** vipassanābhīnivesato paraṃ **tenevākārena ṭhitesu** cakkhādīsu indriyesu **avijjā pahiyati** vipassanaṃ vadḍhaetvā maggassa uppādanena, **atha** maggaparamparāya **arahattamaggavijjā uppajjati**. **Taṇhāmānadiṭṭhiyo** kammaśāmbhārahāvato. **Kammaṣa...pe... eko sandhīti** hetuphalasandhi. Puna **eko sandhīti** phalāhetusandhimāha. **Tayo papañcā atīto addhā** atītabhavaaddhānaṃ tesam adhippetattā. **Anāgatassa paccayo dassito** assutavato puthujjanassa vasena. Sutavato pana ariyasāvakaṃ vasena vaṭṭassa vūpasamo dassitoti.

Samanupassanāsuttavaṇṇanā niṭṭhitā.

6. Khandhasuttavaṇṇanā

48. Tathevāti ārammaṇabhāveveva. Ārammaṇakaraṇavasena upādānehi upādātabbanti **upādāniyaṃ. Idhāpīti** upādānakkhandhesupi. Vibhāgatthe gayhamāne anīṭṭhappasaṅgopi siyā, abhidhamme ca rāsaṭṭho eva āgato, “tadekajjhaṃ abhisam̐yuhitvā”ti vacanato “**rāsaṭṭhena**”icceva vuttaṃ.

Khandhasuttavaṇṇanā niṭṭhitā.

7-8. Soṇasuttādivaṇṇanā

49-50. Visiṭṭhoti padhāno. **Uttamoti** ukkaṭṭho. **Aññaṃ kiṃ bhaveyyāti** aññaṃ kiṃ kāraṇaṃ bhaveyya tathā samanupassanāya aññesaṃ avijjamānatāya vacanapariṭṭhitipabhinnato. **Vajirabhedadesanaṃ** nāma atthato teparivaṭṭadesanā.

Soṇasuttādivaṇṇanā niṭṭhitā.

9-10. Nandikkhayasuttādivaṇṇanā

51-52. Navamadasamesūti suttadvayaṃ saheva uddhaṭaṃ, dvīsipi atthavaṇṇanāya sarikkhabhāvato. Nandanaṭṭhena **nandī**, rañjanaṭṭhena **rāgo**. Satipi saddatthato bhede “**imesaṃ atthato ninnānākaraṇatāyā**”ti vatvāpi pahāyakadhammabhedenā pana labbhateva bhedamattāti dassetuṃ “**nibbidānupassanāya vā**”tiādi vuttaṃ. Virajjanto rāgaṃ pajahaṭṭi sambandho. **Ettāvatāti** “nandikkhayā rāgakkhayo”ti ettāvatā. **Vipassanaṃ niṭṭhapetvā** vipassanākiccassa pariyosānena. **Rāgakkhayāti** vuṭṭhānagāminipariyosānāya vipassanāya rāgassa khepitattā. Anantaraṃ uppanna ariyamaggena samucchadavasena **nandikkhayoti**. Tenāha “**idha maggaṃ dassetvā**”ti. Anantaraṃ pana uppanna ariyaphalena paṭipassaddhivasena **nandirāgakkhayā** sabbhaṃ saṃkilesato cittaṃ vimuccatīti. Tenāha “**phalaṃ dassita**”nti.

Nandikkhayasuttādivaṇṇanā niṭṭhitā.

Attadīpavaggavaṇṇanā niṭṭhitā.

Mūlapaṇṇāsako samatto.

6. Upayavaggo

1. Upayasuttavaṇṇanā

53. Upeṭīti upayo. Kathamupeti? Taṇhāmānādivasenaṭī āha “**taṇhāmānadiṭṭhivasena**”ti. Kathamidhaṃ labbhaṭṭi? “Avimutto”ti vacanato. Taṇhādiṭṭhivasena hi baddho, kiṃ upeti āha “**pañcakkhandhe**”ti tabbinimuttassa tathā upetassa abhāvato. Ko panupeti? Taṃsamaṅgīpuggalo. Taṇhādiṭṭhivasena upagamassa vuttattā **viññāṇanti** akusalakammaviññāṇamevāti vadanti. **Javāpetvāti** gahitajavaṃ katvā. Yathā paṭisandhiṃ ākaḍḍhituṃ samatthaṃ, evaṃ katvā. Tenāha “**paṭisandhī**”tiādi. **Aggahaṇe kāraṇaṃ vuttameva** “okaṃ pahāya aniketasārī”ti gāthāya vissajjane. Kammanimittādivasena paṭisandhiyā paccayabhūtaṃ **ārammaṇaṃ** paṭisandhijanakassa kamma vasena **vocchijjati. Paṭiṭṭhā na hoti** sarāgākāle viya anupaṭṭhānato. **Appatiṭṭhitam** viññāṇaṃ vuttappakārena. **Anabhisāṅkharitvāti** anuppādetvā paccayaghātena.

Upayasuttavaṇṇanā niṭṭhitā.

2. Bījasuttavaṇṇanā

54. Bījajātānīti jāta-saddo padapūraṇamattanti āha “**bījānī**”ti. **Vacanti** setavacaṃ. **Ajjukanti** tacchakaṃ. **Phañijjakaṃ** tulasi. **Abhinnānīti** ekadesenapi akhaṇḍitāni. **Bījatthāyāti** bījakiccāya. **Na upakappatīti** paccayo na hotīti dasseti. **Na pāpitānīti** pūtitam na upagatāni. Taṇḍulasārassa ādānato **sārādāni**. Ārammaṇaggahaṇavasena viññānaṃ tiṭṭhati etthāti **viññāṇaṭṭhitiyo**. **Ārammaṇavasenāti** ārammaṇabhāvavasena. **Sinehanaṭṭhenāti** taṇhāyanavasena siniddhatāpādanena, yato “nandūpasecana”nti vuttaṃ. Tathā hi viropitaṃ taṃ kammaviññānaṃ paṭisandhiaṅkuruppādanasamatthaṃ hoti. **Sappaccayanti** aviññāyoniṣṇāmanasikārādipaccayehi sappaccayaṃ. **Viruhati** vipākasantānuppādanasamattho hutvā.

Bījasuttavaṇṇanā niṭṭhitā.

3. Udānasuttavaṇṇanā

55. Udānaṃ udāharīti attamanavācaṃ nicchāresi. **Esa** vuttappakāro udāhāro. Bhuso nissayo upanissayo, dānameva upanissayo **dānūpanissayo**. Esa nayo sesesupi. Tattha dānūpanissayo annādivatthūsu balavāti balavabhāvena hoti, tasmā upanissayabahulo kāmarāgappahānena kataparicayattā vipassanamanuyūñjanto na cirasseva anāgāmiphalaṃ pāpuṇāti, tathā suvisuddhasīlūpanissayo kāmadosajigucchana. Yadi evaṃ kasmā ime dve upanissayā dubbalāti vuttā? Vijjūpamaññāsseva paccayabhāvato. Sopi bhāvanūpanissayasahāyalābheneva, na kevalaṃ. Bhāvanā pana paṭivedhassa visesahetubhāvato balavā upanissayo. Tathā hi sā vajirūpamaññāssa visesapaccayo. Tenāha “**bhāvanūpanissayo arahattaṃ pāpetī**”ti.

Soti milakatthero. **Vihāranti** vasanaṭṭhānaṃ. Vihārapaccante hi paṇṇasālāya thero viharati. **Upaṭṭhāti** ekalakkhaṇena. **Kūṭagoṇo viya** gamanavīthiṃ. **Tatthāti** allakaṭṭharāsīmhi. **Udakamaṇikānanti** udakathevānaṃ.

Attaniyeva upanesi udānakathāya vuttadhammānaṃ paripuṇṇānaṃ attani saṃvijjānāntā. Tenāha “**uṭṭhānavatā**”tiādi. Ayañhi milakatthero sikkhāya gāravo sappatisso vattapaṭivattaṃ pūrento visuddhasīlo hutvā ṭhito, tasmā “**dubbalūpanissaye**”ti vuttaṃ. Tenāha bhagavā udānento “no cassaṃ...pe... saññojanānī”ti.

Sace ahaṃ na bhaveyyanti yadi ahaṃ nāma koci na bhaveyyaṃ tādissa ahaṃsaddavacanīyassa kassaci atthassa abhāvato. Tato **eva mama parikkhāropi na bhaveyyatassa** ca pabhaṅgubhāvena anavaṭṭhitabhāvato. Evaṃ attuddesikabhāvena padadvayassa atthaṃ vatvā idāni kammaphalavasena vattaṃ “**sace vā panā**”tiādi vuttaṃ. Atītapaccuppannavasena suññataṃ dassetvā idāni paccuppannānāgatavasena taṃ dassento “**idāni panā**”tiādi vuttaṃ. **Evaṃ adhimuccantoti** edisaṃ adhimuttaṃ pavattento. **Vibhavissatīti** vinassissati. Vibhavo hi vināso. Tenāha “**bhijjissatī**”ti. Vibhavadassanaṃ **vibhavoti** uttarapadalopena vuttanti āha “**vibhavadassanena**”ti. **Vibhavadassanaṃ nāma** accantāya vināsassa dassanaṃ. **Tanti** ariyamaggaṃ. Sāmaññajotanaṃ hesā visesaniṭṭhā hotīti tatiyamaggavasena attho vedītabbo.

Upari maggaphalanti aggamaggaphalaṃ. Natthi etissā jātiyā antaranti **anantarā**, anantarā vipassanā maggassa. Gotrabhū pana anulomavīthipariyāpannattā vipassanāgatikaṃ vā siyā, nibbānārammaṇattā maggagatikaṃ vāti na tena maggo antariko nāma hoti. Tenāha “**vipassanā maggassa āsannānantaraṃ nāmā**”ti. Phalaṃ pana nibbānārammaṇattā kilesānaṃ pajahanavasena pavattanato lokuttarabhāvato ca kammamaggagatikameva, kusalavipākabhāvena pana nesam attho pabhedoti vipassanāya phalassa siyā anantarātāti vuttaṃ “**phalassa dūrānantaraṃ nāmā**”ti. “**Āsavānaṃ khayō**”ti pana aggamagge vuccamāne vipassanānaṃ āsannatāya vattabbameva natthi. **Atasitāyeti** na tasitabbe tāsāṃ anāpajjitabbe. **Tāsoti** tāsahetu “tasati etasmā”ti katvā. **Soti** assutavā

puthujjano. **Tilakkhaṇāhatanti** aniccatādilakkhaṇattayalakkhitam. **Manamhi natthoti** īsakam natthomhi, tato parampi tattheva thatvā kiñci apūritattā eva muttoti adhippāyo. “**Na tāso nāma hoti**”ti vatvā tassa atāsabhāvaṃ dassetuṃ “**na hi**”tiādi vuttam. Kalyāṇaputhujjano hi bhayatupaṭṭhānañāṇena “sabhayā saṅkhārā”ti vipassanto na uttasati.

Udānasuttavaṇṇanā niṭṭhitā.

4. Upādānaparipavattasuttavaṇṇanā

56. Catunnaṃ parivaṭṭanavasenāti paccekakkhandhesu catunnaṃ ariyasaccānaṃ parivaṭṭanavasena. **Rūpaṃ abbhāñāsinti** sakalabhūtopādārūpaṃ kucchitabhāvato tattha ca tucchavipallāsātāya “dukkhasacca”nti abhivisiṭṭhena ñāṇena aññāsiṃ paṭivijjhiṃ. Āhārasena rūpakāyassa hānivuddhādīnaṃ pākaṭabhāvato visesapaccayato ca tassa “**āhārasamudayā**”ti vuttam. Dukkhasamudayakathā nāma vaṭṭakathāti “**sacchandarāgo**”ti visesetvā vuttam. **Chandarāgaggahaṇena** ca upādānakammāvijjāpi gahitā eva. **Paṭipannā** hontīti attho. Vattamānakālappayogo hesa yathā “kusalam cittaṃ uppannam hoti”ti. **Paṭiṭṭhahantī**ti paṭiṭṭham labhanti. **Kevalinoti** idha vimuttiguṇena pāripūrīti āha “**sakalino katasabbakiccā**”ti. **Yena teti** yena avasiṭṭhena te asekkhe paññāpentā paññāpeyyuṃ, tam nesam vaṭṭam sekkhānaṃ viya natthi paññāpanāya. **Vaṭṭanti kāraṇam** vaṭṭanaṭṭhena phalassa pavattanaṭṭhena. **Asekkhabhūmivāroti** asekkhabhūmippavatti.

Upādānaparipavattasuttavaṇṇanā niṭṭhitā.

5. Sattaṭṭhānasuttavaṇṇanā

57. Sattasu okāsesūti rūpapajānanādīsu sattasu okāsesu. **Vusitavāsoti** vusitaariyavāso. **Etthāti** imasmiṃ uddese. **Sesaṃ** nāma idha vuttāvasesaṃ. **Vuttanayenāti** heṭṭhā vuttanayena veditabbaṃ. **Ussadanandiyanti** ussannaguṇavato tosaṇaṃ sammodāpanaṃ. Guṇakittanena **palobhanīyaṃ** sekkhakalyāṇaputhujjanānaṃ pasāduppādanena. Idāni vuttameva attham pākaṭam kātuṃ “**yathā hi**”tiādi vuttam.

Ettāvātāti pañcannaṃ khandhānaṃ vasena sattasu ṭhānesu kosalladīpanena ettakena desanākkamena. **Tanti** āramaṇaṃ. **Dhātuādimattamevāti** dhātāyatanapaṭiccasamuppādamattameva. **Imesu dhammesūti** imesu jātādīsu. **Kammaṃ katvāti** sammasanakammaṃ niṭṭhapetvāti attho. Evamettha pañcannaṃ khandhānaṃ vasena sattaṭṭhānakosallapavattiyā pabhedena vibhajivā “**tividhūpaparikkhī**”ti dasseti dhammarājā.

Sattaṭṭhānasuttavaṇṇanā niṭṭhitā.

6. Sammāsambuddhasuttavaṇṇanā

58. Adhikaṃ savisesaṃ payasati payuñjati etenāti **adhippayāso**, visiṭṭhapayogo. Tenāha “**adhikapayogo**”ti. **Imañhi magganti** aṭṭhaṅgikaṃ ariyamaggamāha. **Idhāti** imasmiṃ sutte. **Avattamānaṭṭhenāti** buddhuppādato pubbe na vattamānabhāvena. **Maggam jānāti**ti samudāgamato paṭṭhāya sapubbabhāgaṃ sasambhāravisaṃsāpaṭṭhāya saphalaṃ saudrayaṃ ariyaṃ maggaṃ jānāti avabujjhatīti **maggāññū**. **Viditanti** aññesampi ñātaṃ paṭiladdhaṃ hatthatale āmalakaṃ viya **pākaṭam akāsi**, tathā katvā desesi. Amagge parivajjanena magge paṭipattīti tassa maggakusalatā viya amaggakusalatāpi icchitabbāti āha “**magge ca amagge ca kovido**”ti. **Aham paṭhamam gatoti** aham paṭhamamaggena samannāgato.

Sammāsambuddhasuttavaṇṇanā niṭṭhitā.

7. Anattalakkhaṇasuttavaṇṇanā

59. Purāṇupaṭṭhāketi pubbe padhānapadahanakāle upaṭṭhākabhūte. “Avasavattanaṭṭhena assāmikaṭṭhena suññataṭṭhena attapaṭikkhepaṭṭhena”ti evaṃ **pubbe vuttehi. Ettakena ṭhānenāti** “rūpaṃ, bhikkhave, anattā”ti ārabhitvā yāva “evaṃ me viññānaṃ mā ahoṣī”ti ettakena suttapadesena. Akathitasseva kathanam uttaram, na kathitassāti vuttam “**tāni dassetvā**”ti. **Samodhānetvāti** sampiṇḍitvā. **Vitthārakathāti** vitthārato aṭṭhakathā. **Anattalakkhaṇamevāti** tabbahulatāya tappadhānatāya ca vuttam. Aniccatādīnampi hi tattha taṃḍīpanatthameva vuttattā tadeva jeṭṭham padhānam tathā veneyyajjhāsayato.

Anattalakkhaṇasuttavaṇṇanā niṭṭhitā.

8. Mahālisuttavaṇṇanā

60. Ekantadukkhantiādīni padāni vuttanayāneva, tasmā tattha vuttanayeneva attho veditabbo. Ettha ca yathā sarāgo hetu paccayo saṃkilesāya, evaṃ savipassano maggo hetu paccayo ca visuddhiyāti daṭṭhabbam.

Mahālisuttavaṇṇanā niṭṭhitā.

9. Ādittasuttavaṇṇanā

61. Ekādasahīti rāgādīhi upāyāsapariyosānehi ekādasahi santāpanaṭṭhena aggīhi. **Dvīsūti** aṭṭhamanavamesu. **Dukkhalakkhaṇamevāti** tabbahulatāya tappadhānatāya ca vuttam.

Ādittasuttavaṇṇanā niṭṭhitā.

10. Niruttipathasuttavaṇṇanā

62. Niruttiyova niruttipathāti patha-saddena padavaḍḍhanamāha yathā “bījāniyeva bījajātānī”ti. **Niruttivasenāti** nibbacanavasena. **Pathā ca** atthānurūpabhāvato. **Tiṇipīti** niruttiadhivacanapaññattipathapadāni. Tathā hi “phusatīti phasso”tiādīnā nīharitvā vacanam **nirutti**, “sirīvaḍḍhako dhanavaḍḍhako”tiādīnā vacanamattameva adhikāram katvā pavattam **adhivacanam**, “takko vitakko”tiādīnā taṃtamapakārena nāpanato **paññatti**. Atha vā taṃtamattahappakāsanena nicchitam, niyatam vā vacanam **nirutti**. Adhi-saddo uparibhāge, upari vacanam **adhivacanam**. Kassa upari? Pakāsetabbassa atthassāti pākāṭoyamattho. Adhīnam vacanam **adhivacanam**. Kena adhīnam? Atthena. Atthassa paññāpanatthena **paññattīti** evaṃ niruttiādīpadānam sabbavacanesu pavatti veditabbā. Aññathā “phusatīti phasso”tiādīppakārena niddhāraṇavacanānamyeva niruttitā, sirivaḍḍhakadhanavaḍḍhakapakārānameva abhilāpanam adhivacanatā. “Takko vitakko”ti evampakārānameva ekameva attham tena tena pakārena nāpentānam vacanānam paññattitā ca āpajjeyya. **Asamkiṇṇāti** na samkiṇṇā. Tenāha “**avijahitā...pe... achadditā**”ti. **Na samkiyantīti** na samkiriyanti, **na samkiyissanti** na samkiriyissanti attho. **Appaṭikuttāti** na paṭikkhattā. Yasmā bhaṅgam atikkantam uppādādi atikkantameva hoti, tasmā vuttam “**bhaṅgamevā**”ti. Yasmā desantaram saṅkantopi atikkantanti vuccati, tasmā tadābhāvam dassetuṃ “**desantaram asaṅkamtivā**”ti vuttam. Yattha yattha hi saṅkhārā uppajjanti, tattha tattheva bhijjanti nirujjhanti vipariṇamanti vināsam āpajjanti. Tenāha “**vipariṇatanti...pe... naṭṭha**”nti. **Apākāṭibhūtam** ajātattā eva.

Vasabhaṇagottatāya **vassabhaññā. Mūladiṭṭhigatikāti** mūlabhūtā diṭṭhigatikā, imasmim kappe

sabbapaṭhamam tādīsadiṭṭhisamuppādakā. **Punappunam āvajjentsāti** ahetuvādapaṭisaṃyuttagantham uggahetvā pariyaṇitvā tadattham vīmamsantassa “natthi hetu, natthi paccayo sattānam saṃkilesāyā” tiādinayappavattāya laddhiyā ārammaṇe micchāsati santiṭṭhati, “natthi hetū” tiādivasena anussavūpaladdhe atthe tadākāraparivittakanehi saviggahe viya sarūpato cittaṃ paccupaṭṭhite cirakālaparicayena “evameta” nti nijjhānakkhamabhāvūpagamanena nijjhānakkhantiyā tathāgahite punappunam tatheva āsevantaṃ bahulīkarontassa micchāvitakkena samādiyamānā micchāvāyā mūpatthambhitā atamsabhāvaṃ “tamsabhāva” nti gaṇhantī micchāsati laddhanāmā taṃ laddhisahagatā taṇhā santiṭṭhati. Yathāsakaṃ vitakkādipaccayalābhena tasmim ārammaṇe adhiṭṭhitāya anekaggatam pahāya cittaṃ ekaggatam appitam viya hoti micchāsamādhinā. Sopi hi paccayavisesehi laddhabhāvanābalo idise ṭhāne samādhānapatirūpakiccakaro hotiyeva vālavijjhanādīsu viyāti datṭhabbam. Tathā hi anekakkhattum tenākārena pubbhāgiyesu javanavāresu pavattesu sabbapaccime javanavāre satta javanāni javanti. Tattha paṭhame satekiccho hoti, tathā dutiyādīsu. Sattame pana javane sampatte atekiccho hoti. Tenāha “**assādentassā**” tiādi. **Imesupīti** dvīsipi ṭhānesu.

Paccuppannam vāti ettha **iti**-saddo ādiattho. Tena “yadetaṃ anāgataṃ nāma, nayidaṃ anāgata” ntiādikam saṅgaṇhāti. **Tepīti** te vassabhaññāpi **na maññimsu** lokasamaññāya anatikkamanīyato. Tenāha “**atitam panā**” tiādi. **Khandhānam** upari nirulhā **paṇṇatti**.

Niruttipathasuttavaṇṇanā niṭṭhitā.

Upayavaggavaṇṇanā niṭṭhitā.

7. Arahantavaggo

1. Upādiyamānasuttavaṇṇanā

63. Gaṇhamānoti “etaṃ mamā” tiādinā gaṇhamāno. **Pāsenāti** rāgapāsenā. Tañhi māro mārapāsoti maññāti. Tenāha “antalikkhacaro pāso, yvāyaṃ carati mānaso” ti (saṃ. ni. 1.151; mahāva. 33). **Mutto nāma hoti** anupādiyato sabbaso khandhassa abhāvato.

Upādiyamānasuttavaṇṇanā niṭṭhitā.

2-6. Maññamānasuttādivaṇṇanā

64-68. “Etaṃ mamā” tiādinā. **Maññanā abhinandanā** ca. **Taṇhāchandoti** taṇhā eva chando. Sā hi taṇhāyanaṭṭhena taṇhā, chandīkatakāṭṭhena chando. Catuttham aniccalakkhaṇamukhena vuttam, pañcamam dukkhalakkhaṇamukhena, chaṭṭham anattalakkhaṇamukhena. Sesam tīsipi sadisamevāti vuttam “eseva nayo” ti.

Maññamānasuttādivaṇṇanā niṭṭhitā.

7. Anattaniyasuttavaṇṇanā

69. Anattaniyanti na attaniyam. Tenāha “**na attano santaka**” nti.

Anattaniyasuttavaṇṇanā niṭṭhitā.

8-10. Rajanīyasaṅghitasuttādivaṇṇanā

70-72. Rajanīyenāti rajanīyena rāgupādakena. Tenāha “**rāgassa paccayabhāvenā**” ti.

Rāhulasamyutte rāhulatherassa pucchāvasena āgatā. Idha rādhattherassa surādhattherassa ca pucchāvasena, pāli pana sabbattha sadisā. Tenāha “**vuttanayeneva veditabbāni**”ti.

Rajaniyasaṅghitasuttādivaṇṇanā niṭṭhitā.

Arahantavaggavaṇṇanā niṭṭhitā.

8. Khajjanīyavaggo

1-3. Assādasuttādivaṇṇanā

73-75. Catusaccameva kathitaṃ assādādīnañceva samudayādīnañca vasena desanāya pavattattā. Yasmā assādo samudayasaccam, ādīnavo dukkhasaccam, nissaraṇaṃ maggasaccam nirodhasaccañcāti vuttovāyamattho; dutiye samudayassādo samudayasaccam, ādīnavo dukkhasaccam, atthaṅgamo nirodhasaccam, nissaraṇaṃ maggasaccanti vuttovāyamattho; tatiyaṃ ariyasāvakasappa vasena vuttaṃ.

Assādasuttādivaṇṇanā niṭṭhitā.

4. Arahantasuttavaṇṇanā

76. Yattakā sattāvāsāti tasmim tasmim sattanikāye āvasanaṅghena sattā eva sattāvāsā. Tena yattakā sattāvāsā, tehi sabbehipi ete aggā ete seṭṭhā, ye ime arahantāti dasseti. **Purimanayenevāti** purimasim sattaṅghānakosallasutte vuttanayena.

Tadatthaparidīpanāhīti “pañcakkhandhe pariññāya. Taṅhā tesam na vijjati. Asmimāno samucchinno”tiādīnā tassa yathānididhassa suttassa atthadīpanāhi ceva “anejaṃ te anuppattā, cittaṃ tesam anāvila”ntiādīnā visesatthaparidīpanāhi ca. Jhānamaggaphalaparīyāpannaṃ atisayitasukhaṃ etesamatthīti **sukhinoti** āha “**jhāna...pe... sukhitā**”ti. **Taṅhā tesam na vijjatīti** ettha tesam apāyadukkhajanikā taṅhā na vijjatīti vuttaṃ. Vaṭṭamūlikāya taṅhāya abhāvā “nandī tesam na vijjati”ti ettha vuccatīti. **Imassapīti pi**-saddena dukkhasābhāvenapīti dukkhābhāvo viya vaṭṭamūlikataṅhābhāvo sampiṇḍiyatīti daṭṭhabbaṃ. Tena hi te anupādisesanibbānappattiyā accantasukhitā evāti vuccantīti. “Seyyohamasmī”tiādīnāyappavattiyā **navavidho. Nāṇenāti** aggamaggaññāṇena.

Arahattaṃ anuppattā. **Alittāti** amakkhitā. **Brahmabhūtāti** brahmabhāvaṃ pattā, brahmato vā ariyamaggañāṇato bhūtā ariyāya jātiyā jātā. Satta saddhammā gocaro pavattiṅghānaṃ etesanti **sattasaddhammagarā**.

Nirāsankacāro nāma gahito kutocipi tesam āsankāya abhāvato. Sammādiṭṭhiādīhi **dasahi aṅgehi** sammāvimutti-sammāñāṇapariyosānehi. “Āguṃ na karotī”tiādīhi **catūhi kāraṇehi. Taṅhā tesam na vijjatīti** idampi taṅhāpahānassa bahūpakāratādassanaṃ. Tenāha “**dāsakārikā taṅhāpi tesam natthī**”ti.

Na vikampanti “seyyohamasmī”tiādīnā.

Uddhaṃ tiriyaṃ apācīnanti ettha “uddhaṃ vuccatī”tiādīnā rūpamukhena attabhāvaṃ gahetvā pavatto paṭhamanayo. Kālattayavasena dhammappavattiṃ gahetvā pavatto dutiyanayo. Ṭhānavasena sakalalokadhātuṃ gahetvā pavatto tatiyanayo. **Buddhāti** cattāri saccāni buddhavanto.

Sīhanādasamodhānanti sīhanādānaṃ saṃkalanaṃ. Loke attano uttaritarassābhāvā **anuttarā**. Uttaro tāva tiṅghatu puriso, sadisopi tāva natthīti **asadisā**. Sakalampi bhavaṃ uttaritvā **bhavapiṭṭhe ṭhatvā** vimuttisukhena sukhitattādivasena ekavīsatiyākārehi **sīhanādaṃ nadanti**.

Arahantasuttavaṇṇanā niṭṭhitā.

5. Dutiyarahantasuttavaṇṇanā

77. **Suddhikamevā**ti suddhasaṃkhittabandhameva katvā.

Dutiyarahantasuttavaṇṇanā niṭṭhitā.

6. Sīhasuttavaṇṇanā

78. **Sīhoti** parissayasahanato paṭipakkhahananato ca “sīho”ti laddhanāmo migādhipati. **Cattāro**ti ca samānepi sīhajātikabhāve vaṇṇavisesādisiddhena vivesena cattāro sīhā. Te idāni nāmato vaṇṇato āhārato dassetvā idhādhippetasīhaṃ nānappakārato vibhāvetuṃ “**tiṇasīho**”tiādi āraddhaṃ. Tiṇabhakkho sīho **tiṇasīho** purimapade uttarapadalopena yathā “sākapatthivo”ti. Kāḷavaṇṇatāya **kāḷasīho**. Tathā **paṇḍusīho**. Tenāha “**kāḷasīho kāḷagāvisadiso, paṇḍusīho paṇḍupalāsavaṇṇagāvisadiso**”ti. Rattakambalassa viya kesaro kesarakalāpo etassa atthīti **kesarī**. Lākhārasaparikkammakatehi viya pādapariyantehīti yojanā.

Kammānubhāvasiddhaādhipaccamahesakkhatāhi **sabbamigagaṇassa rājā suvaṇṇaguhato vā**tiādi “sīhassa vihāro kiriyā evaṃ hoti”ti katvā vuttaṃ.

Samam patiṭṭhāpetvāti sabbabhāgehi samameva bhūmiyaṃ patiṭṭhāpetvā. **Ākaḍḍhitvā**ti purato ākaḍḍhitvā. **Abhiharitvā**ti abhimukhaṃ haritvā. **Saṅghātanti** vināsaṃ. Vīsatīyaṭṭhikaṃ ṭhānaṃ **usabhaṃ**.

Samasīhoti samajātiko samabhāgo ca sīho. **Samānosmī**ti desanāmattaṃ, samappabhāvatāyapi na bhāyati. **Sakkāyadiṭṭhibalavatāyā**ti “ke aññe amhehi uttaritarā, atha kho mayameva mahābalā”ti evaṃ balātimānanimittāya ahaṅkārahetubhūtāya sakkāyadiṭṭhiyā balabhāvena. **Sakkāyadiṭṭhipahīnattā**ti sakkāyadiṭṭhiyā pahīnattā nirahaṅkāratā attasinehassa suṭṭhu samugghāṭitattā **na bhāyati**.

Tathā tathāti sīhasadisatādinā tena tena pakārena attānaṃ kathesīti vatvā tamatthaṃ vivaritvā dassetuṃ “**sīhoti kho**”tiādi vuttaṃ.

Katābhinihārassa lokanāthassa bodhiyā niyatabhāvappattiyā ekantabhāvībuddhabhāvoti katvā “tīsu pāsādesu nivāsakālo, magadharañño paṭiññādānakālo, pāyāsassa paribhuttakālo”tiādinā abhisambodhito purimāvatthāpi sīhasadisam katvā dassitā. Bhāvini, bhūtopacāropi hi lokavohāro. Vijjābhāvasāmaññato bhūtavijjā itaravijjāpi ekajjhaṃ gahetvā paṭiccasamuppādasammasanato taṃ puretaraṃ siddhaṃ vipākaṃ viya katvā āha “**tisso vijjā visodhetvā**”ti. Anulomapaṭilomato pavattaññavasena “**yamakaññamanthanenā**”ti vuttaṃ.

Tattha viharantassāti ajapālanigrodhamūle viharantassa. **Ekādasame divaseti** sattasattāhato paraṃ ekādasame divase. **Acalapallaṅketi** isipatane dhammacakkapavattanatthaṃ nisinnapallaṅke. Tampi hi kenaci appaṭivattiyadhammacakkapavattanatthaṃ nisajjāti katvā vajirāsanaṃ viya acalapallaṅkaṃ vuccati. **Imasmiṅca pana padeti** “dveme, bhikkhave, antā”tiādinayappavatte imasmiṃ saddhammakotṭhāse. **Dhammaghoso...pe... dasasahasilokadhātum paṭicchādesi** “sabbattha ṭhitā suṇantū”ti adhiṭṭhānena. **Soḷasahākārehī**ti “dukkhapariññā, samudayappahānaṃ, nirodhasacchikiriyā, maggabhāvanā”ti evaṃ ekekasmim magge cattāri cattāri katvā soḷasahi ākārehi.

Vuttoyeva, na idha vattabbo, tasmā tattha vuttanayeneva veditabboti adhippāyo. Yasmā ca aparehipi aṭṭhahi kāraṇehi bhagavā tathāgatoti ārabhitvā **udānaṭṭhakathā**dīsipi (udā. aṭṭha. 18; itivu.

38) tathāgatapadassa attho vutto eva, tasmā tattha vuttanayena attho veditabbo. Yadi pi bhagavā na bodhipallaṅke nisinnamattova abhisambuddho jāto, tathāpi tāya nisajjāya nisinnova panujja sabbaparissayaṃ abhisambuddho jāto. Tathā hi taṃ “aparājitapallaṅka”nti vuccati. Tasmā “yāva bodhipallaṅkā vā”ti vatvā tena aparitussanto “yāva arahattamaggañāṇā vā”ti āha.

Iti rūpanti ettha **iti**-saddo nidassanattho. Tena rūpaṃ sarūpato parimāṇato paricchedato dassitanti āha “**idaṃ rupa**”ntiādi. “**Idaṃ rūpa**”nti hi iminā bhūtopādāyabhedarūpaṃ sarūpato dassitaṃ. **Ettakaṃ rūpanti** iminā taṃ parimāṇato dassitaṃ. Tassa ca parimāṇassa ekantabhāvadassanena “**na ito bhiyyo rūpaṃ atthi**”ti vuttaṃ. **Sabhāvatoti** salakkhaṇato. **Sarasatoti** sakiccato. **Pariyantatoti** parimāṇapariyantato. **Paricchedatoti** yattake ṭhāne tassa pavatti, tassa paricchedanato. **Paricchindanatoti** pariyoṣānappattito. **Taṃ sabbam dassitaṃ hoti** yathāvuttena vibhāgena. **Ayaṃ rūpassa samudayo nāmāti** ayaṃ āhārādi rūpassa samudayo nāma. Tenāha “**ettāvata**”tiādi. **Atthaṅgamoti** nirodho. “**Āhārasamudayā āhāranirodhā**”ti ca asādhāraṇameva gahetvā sese ādi-saddena saṅgaṇhāti.

Paṇṇāsakkhaṇapaṭimaṇḍitanti paṇṇāsaudayabbayalakkhaṇavibhūsitam samudayatthaṅgamagahaṇato. **Khīṇāsavattāti** anavasesaṃ sāvasesaṅca āsavānaṃ parikkhīṇattā. Anāgāmīnampi hi bhayaṃ cittutrāso ca na hotīti. **Nānasamvego** bhayatūpaṭṭhānañāṇaṃ. **Itaresaṃ pana devānanti** akhīṇāsava deve sandhāya vadati. **Bhoti dhammālanamattanti** vācasikaṃ tathālanamattam.

Cakkanti satthu āṇacakkam, taṃ pana dhammato āgatanti **dhammacakkam**. Tattha ariyasāvakaṇaṃ paṭivedhadhammato āgatanti **dhammacakkam**. Itaresaṃ desanādhhammato āgatanti **dhammacakkam**. Duvidhepi ñāṇaṃ padhānanti ñāṇasīsenā vuttaṃ “**paṭivedhañāṇampi desanāñāṇampi**”ti. Idāni taṃ ñāṇadvayaṃ sarūpato dassetuṃ “**paṭivedhañāṇaṃ nāmā**”tiādi vuttaṃ. Yasmā cassa ñāṇassa suppaṭividdhattā bhagavā tāni saṭṭhi nayasahassāni veneyyānaṃ dassetuṃ samattho ahoṣi, tasmā tāni saṭṭhi nayasahassāni tena ñāṇena saddhiṃyeva siddhānti katvā dassento “**saṭṭhiyā ca nayasahashehi paṭivijjhī**”ti āha. **Tiparivaṭṭanti** idaṃ dukkhanti ca, pariññeyyanti ca, pariññātanti ca evaṃ tiparivaṭṭam, taṃyeva **dvādasākāraṃ**. **Tanti desanāñāṇaṃ pavatteti esa** bhagavā. **Appaṭipuggaloti** patinidhibhūtapuggalarahito. **Ekasadisassāti** nibbikārassa.

Sīhasuttavaṇṇanā niṭṭhitā.

7. Khajjanīyasuttavaṇṇanā

79. **Vipassanāvasenāti** etarahi rūpavedanādayo anussarivā “pubbepāhaṃ evaṃvedano ahoṣi”nti atīṭānaṃ rūpavedanādināṃ paccuppannehi vīsesābhāvadassanā vipassanā, tassā vipassanāya vasena. Yvāyaṃ “na idaṃ abhiññāvasenā”ti paṭikkhepo kato, tassa kāraṇaṃ dassento “**abhiññāvasena hī**”tiādimāha. **Khandhapaṭibaddhā** nāma gottavaṇṇahārādayo. **Evaṃ anussarantoti** yathāvuttavipassanāvasena anussaranto. **Sabhāvadhammānaṃ** eva anussaraṇassa vuttattā “**suññatāpabba**”nti vuttaṃ.

Yasmā te eva rūpādayo neva attā, na attaniyā asārā anissarā, tasmā tato suññā, tesam bhāvo **suññatā**, tassā **lakkhaṇaṃ** ruppanādikaṃ **dassetuṃ**.

Kiñcāti hetuatthajotake kāraṇe paccattavacananti āha “**kiñcāti kāraṇapucchā, kena kāraṇena rūpaṃ vadethā**”ti. **Etanti** etaṃ bhūtopādāyabhedam dhammajātam. **Kena kāraṇena rūpaṃ nāmāti** kiṃ kāraṇaṃ nissāya rūpanti vuccatīti attho. **Kāraṇuddesoti** kāraṇassa uddisanaṃ. **Ruppatīti** ettha **rūpaṃ** nāma sītādivirodhipaccayasannipātena visadisuppatti. Tenāha “**sītenapī**”tiādi. **Pabbatapādeti** cakkavālapabbatapāde, so pana tattha accuggato pākāro viya ṭhito. Tathā hi tattha sattā olambantā tiṭṭhanti. **Hatthapāsāgatāti** hatthapāsaṃ āgatā upāgatā. **Tatthāti** tasmim hatthapāsāgate satte.

Chijjivāti mucchāpattiyā muccitvā, aṅgapaccaṅgaucchedavasena vā paricchijjivā. **Accantakhāre udaketi** ātapasantāpābhāvena atisītabhāvameva sandhāya accantakhāratā vuttā siyā. Na hi taṃ kappasaṅṭhānaudakaṃ sampattikaramahāmeghavuṭṭhaṃ pathavīsandhāraṃ kappavināsaudakaṃ viya khāraṃ bhavituṃ arahati, tathā sati pathavīpi vilīyeyyāti. **Mahimsakarattṭhaṃ** nāma himavantapadesa ekaṃ raṭṭhaṃ.

Avīcimahānirayeti saussadaṃ avīcinirayaṃ vuttaṃ. **Gaṅgāpiṭṭheti** gaṅgāṭire.

Sarantā gacchantīti sarīsapapadassa atthaṃ vadati. **Etanti** ruppanaṃ. Yathā kaṭṭhinatā pathaviyā paccattalakkhaṇaṃ, evaṃ ruppanaṃ rūpakkhandaṃ paccattalakkhaṇaṃ, sabhāvabhūtalakkhaṇanti attho.

Purimasadisanti purime rūpakkhandaṃ vuttanaṃ sadisaṃ. Taṃ “kinti kāraṇapucchā”tiādinā **vuttanayeneva veditabbaṃ. Sukhaṃ** iṭṭhāraṃmaṇaṃ. **Sukhādīnaṃ** vedanānaṃ. **Paccayatoti** āraṃmaṇapaccayatoti. **Ayamattṭhoti** “sukhāraṃmaṇaṃ sukhaṃ vuccati”ti ayamattṭho. Uttarapadalopena hesa niddeso. **Vedayatīti** anubhavati. **Vedayitalakkhaṇāti** anubhavanalakkhaṇā.

Nīlapuppheti nīlavaṇṇapupphe. **Vatthe vāti** nīlavatthe. **Vā-saddena** vaṇṇadhātuādiṃ saṅgaṇhāti. **Appanaṃ vā** jhānaṃ **vāpento. Uppajjanasaññāpīti** yaṃ kiñci nīlaṃ rūpāyatanaṃ ārabha uppajjanasaññāpī, yā pakīṇṇakasaññāti vuccati.

Rūpattāyāti rūpabhāvāya. **Yāgumevāti** yāgubhāvinameva vatthūṃ. **Yāguttāya** yāgubhāvāya. **Pacati nāma** puggalo. **Evanti** yathā yāguādivatthūṃ puriso yāguādiatthāya pacati nipphādeti, yaṃ evaṃ ruppanādisabhāve dhammasamūhe yathāsakaṃ paccayehi abhisāṅkharīyamāne cetanāpadhāno dhammasamūho pavattanatthaṃ visesapaccayo hutvā te abhisāṅkharoti niropeti nibbatteti. Tenāha “**paccayehi**”tiādi. **Rūpamevāti** rūpasabhāvameva, na aññaṃ sabhāvaṃ. **Abhisāṅkharotīti** itarehi paccayadhammehi adhikaṃ suṭṭhu paccayatāṃ karoti. “Upagacchati yāpeti āyūhatī”ti tasseva vevacaṇāni. Abhisāṅkharāṇameva hi āyūhanādīni. **Nibbatteti** tesāṃ dhammānaṃ ruppanādibhāvena nibbattiyā paccayo hotīti attho. **Cetayitalakkhaṇassa saṅkhārassāti** idaṃ saṅkhārakkhandhadhammānaṃ cetanāpadhānattā vuttaṃ. Tathā hi bhagavā suttantabhājanīye saṅkhārakkhandhaṃ vibhajantena cetanāva vibhattā.

Vātiṅgaṇaṃ brahatiphalaṃ. **Caturassavallīti** tivutālātā. **Akhārikanti** khārarasarahitaṃ, taṃ pana paṇṇaphalādi. Yattha loṇaraso adhiko, taṃ **loṇikanti** āha “**loṇayāgū**”tiādi. **Ambilādibhedāṃ** rasaṃ.

Ākārasaṅṭhānagahaṇavasenati nīlapītādiākāragahaṇavasena ceva vaṭṭacaturassādisaṅṭhānagahaṇavasena ca. **Vināpi ākārasaṅṭhānāti** ākārasaṅṭhānehi vinā, te ṭhapetvāpi. **Paccattabhedagahaṇavasena**ti tassa tassa āraṃmaṇassa pabhedagahaṇavasena. **Asammohatoti** yāthāvato. **Viseso** visesatthadīpanato, **aviseso** yaṃ dhammo avisesadīpanato. Tenāha “**viseso veditabbo**”ti. Jānanañhi avisitṭhaṃ, taṃ samāsapadato upasaggā visesenti. Tathā hi sañjānanapadaṃ paccabhiññānamittāṃ ākāragahaṇamattaṃ bodheti, vijānanapadaṃ tato visitṭhavisayagahaṇaṃ. Pajānanapadaṃ pana tatopi visitṭhataraṃ pakārato avabodhaṃ bodheti. Tenāha “**tassāpi**”tiādi. **Āraṃmaṇasañjānanamattamevāti** nīlādibhedassa āraṃmaṇassa sallakkhaṇamattameva. Avadhāraṇena lakkhaṇapaṭivedhattaṃ nivatteti. Tenāha “**anicca**”ntiādi. Nāṇasampayuttacittehi vipassantassa vipassanāya paguṇabhāve sati nāṇavippayuttana cittenapi vipassanā hotiyevāti āha “**aniccādivasena lakkhaṇapaṭivedhaṇa pāpeti**”ti. **Paṭivedhanti** ca upaladdhimeva vadati, na paṭivijjanaṃ. Tenāha “**ussakkivā panā**”tiādi. **Ussakkivāti** ussakkāpetvā maggapātubhāvampi pāpeti asammoahasabhāvattā. Yathā lakkhaṇapaṭivedhakāle sañjānanalakkhaṇavasena saññānaanurūpavaseneva pavattaṃ, evaṃ viññānavijānanavasena vāyaṃ anurūpavaseneva pavattatīti daṭṭhabbaṃ.

Idāni tamattaṃ heraññikādiupamāya vibhāvetuṃ “**yathā hī**”tiādimāha. Hiraññaṃ vuccati

kahāpaṇaṃ, hiraññajānane niyutto **heraññiko**. Lokavohāre ajātā asañjātā buddhi etassāti **ajātabuddhi**, bāladārako. Vohārakusalo gāmvāsī puriso **gāmikapuriso**. Upabhogaparibhogārahattā **upabhogaparibhogaṃ**. Tambakaṃsamayattā **kūṭo**. Mahāsārattā **cheko**. Aḍḍhasārattā **karāṭo**. Nihīnasārattā **saṅho**. Ettha ca yathā heraññiko kahāpaṇaṃ cittādibhāvato uddhaṃ kūṭādibhāvaṃ rūpadassanādivasena uppattiṭṭhānatopi jānanto anekākārato jānāti, evaṃ paññā ārammaṇaṃ nānappakārato jānāti paṭivijjhati, tāya saddhiṃ pavattamānaviññāṇampi yathāvisayaṃ ārammaṇaṃ jānāti.

Evaṃ svāyaṃ nesam jānane vireso aññesaṃ avisayo, buddhānaṃ eva visayoti idaṃ viresaṃ milindapañhena vibhāvetuṃ “**tenāhā**”tiādimāha, taṃ suviññeyyameva.

Attasuññānaṃ sabhāvadhammānaṃ dhammamattatāya kathitattā “**anattalakkhaṇaṃ kathetvā**”ti vuttaṃ. Heṭṭhimamaggā ca yadi adhigatā, arahattassa anadhigatattā “**ekadesamattenā**”ti vuttaṃ, taṃ aniccalakkhaṇaṃ dassetuṃ idaṃ pabbamāraddhaṃ, itarāni dve lakkhaṇāni tassa parihārabhāvenāti adhippāyo.

Yasmā panettha “taṃ kiṃ maññatha, bhikkhave”tiādidesanāya tīsu lakkhaṇesu idameva padhānabhāvena dassitaṃ, idaṃ appadhānabhāvenāti na sakkā vattuṃ, tasmā “**tīpi lakkhaṇāni samodhānetvā dassetumpi**”ti vuttaṃ. **Apacinātīti** apacayaḡāmīdhamme nivatteti ekaṃsato apacayaḡāmīpaṭipadāya paripūraṇato. Tenāha “**no ācinātī**”tiādi. **Vaṭṭaṃ vināsetīti** vidhamati adassanaṃ gameti. **Neva cinātīti** na vaḍḍheti. **Tadevāti** taṃ vaṭṭaṃ eva. **Vissajjetīti** chaḍḍeti. **Vikiratīti** viddhamseti. **Vidhūpetīti** vaṭṭattayasāṅkhātāṃ aggikkhandhaṃ vigatadhūmaṃ vigatasantāpaṃ karotīti atthoti āha “**nibbāpetī**”ti.

Evaṃ passantiādi anāḡāmiphale ṭhitassa ariyasāvakaṃsā aggamaggaphalādhigamāya desanāti adhippāyenāha “**vaṭṭaṃ vināsetvā ṭhitaṃ mahākhiṇāsavaṃ dassessāmī**”ti. Khīṇāsavassa anāḡatabhāvadassanaṃyeva, sabbā cāyaṃ heṭṭhimā desanā suddhavipassanākathā, saḡapaṭhamamaggā vā saḡavijjūpamadhammā vā vipassanākathāti dassento “**ettakena ṭhānenā**”tiādimāha.

Namassantiyeva mahatā ḡaravabahumānena. Tenāha “**namo te purisājaññā**”tiādi. Tattha nidassanaṃ dassento “**āyasmantaṃ nītattheraṃ viyā**”ti vatvā tamatthaṃ vibhāvetuṃ “**thero**”tiādimāha. Tattha **khuraggeyevāti** kesoropanatthaṃ khuradhārāya agge sīse ṭhapite tacapañcakakammaṭṭhānamukhena bhāvanaṃ anuyuñjanto **arahattaṃ patvā**. **Brahmavimānāti** brahmānaṃ nivāsabhūtā vimānā.

Khajjanīyasuttavaṇṇanā niṭṭhitā.

8. Piṇḍolyasuttavaṇṇanā

80. Apakarīyati etenāti **apakaraṇaṃ**, padaṃ. Apakaraṇaṃ pakaraṇaṃ kāraṇanti atthato ekaṃ. Tenāha “**kismiñcīdeva kāraṇe**”ti. **Nīharitvāti** attano samīpacārabhāvato apanetvā. Tathākaraṇaṇca evamete ettakampi appaṭirūpaṃ akatvā āyatīṃ sammā paṭipajjissantīti. **Laddhabalāti** laddhaññābalā.

Ekadvīhikāyāti ekekassa ceva dvīnaṃ dvīnañca īhikā gati upasāṅkamanā ekadvīhikā. Tenāha “**ekeko ceva dve dve ca hutvā**”ti. Puthujjanānaṃ samuditānaṃ nāma kiriyā tādisīpi siyāti vuttaṃ “**keḷimpi kareyyu**”nti. Parikkappanasena sammāsambuddhaṃ uddissa pesalā bhikkhūpi evaṃ karontīti.

Yugandharapabbatādīnaṃ antare sīdantaraṃ samuddaṃ nāma. Tattha kira vāto na vāyati, patitaṃ yaṃ kiñcīpi sīdantaradiyaṃ vilīyantā sīdanteva, tasmā taṃ parivāretvā ṭhitā yugandharādayopi

sīdapabbatā nāma. Taṃ sandhāya vuttaṃ “**sīdantare sannisinnāṃ mahāsamuddaṃ viyā**”ti. **Āhārahetūti** āmisahetu sappitelādinimittaṃ, tesāṃ paṇāmanā.

Pacchimanti nihīnaṃ. Tenāha “**lāmaka**”nti, lāmakanto idhādhippeto –

“Migānaṃ koṭṭhuko anto, pakkhīnaṃ pana vāyaso;
Eraṇḍo anto rukkhānaṃ, tayo antā samāgatā”ti. –

Ādīsu (jā. 1.3.135) viya. **Ulatīti** abhicarati. Abhisapanti etenāti **abhisāpo**. Abhisāpavatthu **piṇḍolyaṃ**. Attho phalaṃ vaso etassāti atthavasāṃ, kāraṇaṃ, tampi tesu atthi, tattha niyuttāti **atthavasikā**.

Anto hadayassa abbhantare **anupaviṭṭhā** sokavatthūhi.

Abhijjhāyitāti abhijjhāyanasīlo. Abhiṇṇhappavattiyā ceva bahulabhāvena ca **bahularāgo**. **Pūtibhāvenāti** kuthitabhāvena. Byāpādo hi uppajjamāno cittaṃ apagandhaṃ karoti, na sucimanuññabhāvaṃ. **Bhattanikkhittakāko viyāti** idaṃ bhattaṭṭhānassa asaraṇena kākassa naṭṭhasatitā paññāyatīti katvā vuttaṃ, na bhattanikkhittatāya. **Asaṇṭhitoti** asaṇṭhitacitto. **Kaṭṭhatthanti** kaṭṭhena kattabbakiccaṃ.

Pāpavitakkehi kato, tasmā te anavasesato pahātabbāti **dassanattamaṃ**. Dvinnaṃ vuttattā eko pubbhāgo, itaro missakoti vuttaṃ yuttanti adhippāyena “**ettha cā**”tiādi vuttaṃ. Evaṃ taṃ bhāventassa nirujjhanti evāti ekekamissakatāvasena gahetabbanti porāṇā. Upari tiparivaṭṭadesanāya animittasamādhiyeva dīpito. Tenāha “**yāvañcida**”nti. **Niddosoti** vītarāgādinā niddoso.

Piṇḍolyasuttavaṇṇanā niṭṭhitā.

9. Pālileyyasuttavaṇṇanā

81. Pariyādiṇṇarūpacittāti rāgādīhi pariyādiyitvā khepetvā gahitacittā.

Bhagavato cāro vidito paricayavasena. **Satthā paribhogaṃ karoti** anuggaṇhanto “evaṃ hissa duggatimokkho bhavissatī”ti. **Aññatrāti** vinā.

Nāgenāti buddhanāgena aṅkusarahitena. Tato eva ujjubhūtena **cittena**. **Īsānantassa** naṅgalasādisānantassa hatthino evaṃ cittaṃ sameti. Tattha kāraṇamāha “**yadeko ramatī vane**”ti. Etena kāyavivekena ratisāmaññaṃ vadati.

Attano dhammatāyāti pakatiyā sayameva.

Āsavānaṃ khayoti idha arahattaṃ adhippetāṃ, taṃ pana aggamaggānantaramevāti āha “**maggānantaraṃ arahattaphala**”nti. Vicayo desanāpañña adhippetā, sā ca anekadhā pavattā evāti vuttaṃ “**vicayaso**”ti, anekakkhattuṃ pavattamānāpi vicayo evāti katvā “**vicayenā**”ti attho vutto. **Sāsanadhammoti** sīlakkhandhādīparidīpano pariyattidhammo. **Parivitaṅko udapādi** “cattāro satipaṭṭhānā”tiādinā, evaṃ koṭṭhāsato paricchiṇṇa desite mayā dhamme katamassa jānanassa antarā āsavānaṃ khayoti hotīti ekaccassa kaṅkhā hotiyevāti adhippāyo. Diṭṭhi eva samanupassanā **diṭṭhisamanupassanā**. **Diṭṭhisāṅkhāro**ti diṭṭhipaccayo saṅkhāro. Tato eva taṇhāpaccayo hotīti vuttaṃ “**tatojo so saṅkhāro**”ti. **Tato taṇhāto so saṅkhāro jātoti** catūsu esa diṭṭhisāṅkhāro diṭṭhūpanissayo saṅkhāro jāyati. **Avijjāsamphassoti** avijjāsampayuttasamphasso. Evamettha bhagavā saḷayatananāmarūpaviññāṇāni saṅkhārapakkhikāneva katvā dasseti.

Ettake **ṭhāneti** “idha bhikkhave assutavā puthujjano”tiādiṃ katvā yāva “na me bhavissatī”ti ettake ṭhāne. **Gahitagahitadiṭṭhinti** sakkāyadiṭṭhiyā “so attā, so loko”tiādinā pavattaṃ sassatadiṭṭhiṃ, no cassaṃ, no ca me siyā”tiādinā pavattaṃ ucchedadiṭṭhinti tathā tathā gahitadiṭṭhiṃ. “Iti kho, bhikkhave, sopi saṅkhāro anicco”tiādidesaṇāya **vissajjāpento āgato**. Tattha tatthevāssa uppannadiṭṭhivivecanato imissā desaṇāya **puggalajjhāsayena** pavattitā veditabbā, tevīsatiyā ṭhānesu arahattapāpanena **desanāvīlāso**. **Tatojo so saṅkhāro**ti tato vicikicchāya paccayabhūtanāhāto jāto vicikicchāya sampayutto saṅkhāro. Yadi saḥajātāpaccayavasena tato taṇhāto jātojo saṅkhāroti vucceyya, idamayuttanti dassento “**taṇhāsampayutta...pe... jāyatī**”ti codeti. Itaro upanissayakoṭi idhādhippetāti dassento “**appahīnattā**”ti vatvā “**yassa hī**”tiādinā tamatthaṃ vivarati. Na hi taṇhāya vicikicchā sambhavati. Yadi asati saḥajātakoṭiyā upanissayakoṭiyā taṇhāpaccayā vicikicchāya sambhavo eva. **Diṭṭhiyāpī**ti dvāsaṭṭhidiṭṭhiyāpi. Tenāha “**catūsu hī**”tiādi. Vīsati sakkāyadiṭṭhiyo sassatadiṭṭhiṃ ucchedadiṭṭhiṃ vicikicchaṇca pakkhipitvā paccekam aniccatāmukhena vipassanaṃ dassetvā arahattaṃ pāpetvā desaṇā niṭṭhāpitāti āha “**tevīsatiyā ṭhānesū**”tiādi.

Pālileyyasuttavaṇṇanā niṭṭhitā.

10. Puṇṇamasuttavaṇṇanā

82. Dissati apadissatīti **deso**, kāraṇaṃ, taṇca kho ñāpakam datṭhabbaṃ. Yañhi so jānitukāmo ruppanādisabhāvaṃ, paṭhamaṃ pana sarūpaṃ pucchitvā puna tassa viśeso pucchitabboti paṭhamaṃ “**ime nu kho**”tiādinā pucchaṃ karoti, idhāpi ca so viśeso eva tassa bhikkhuno antanti dasseti. **Ajānanto viya pucchati** tesam hetunti adhippāyo.

Taṇhāchandaṃulakā pabhavattā. **Pañcupādānakkhandhā**ti ettha viśesato taṇhupādānassa gahaṇaṃ itarassa taggahaṇeneva gahitaṃ tadavinābhāvatoti chandarāgo eva uddhaṭo. **Idanti** tappañhapaṭikkhipanaṃ. Yadi pi khandhā upādānehi saḥajātāpi honti upādānassa anārammaṇabhūṭāpi, upādānaṃ pana tehi saḥajātameva, tadārammaṇaṇca hotiyevāti dasseti. Na hi saḥajātānaṃ anārammaṇaṇca upādānaṃ atthīti. Idāni tamatthaṃ vivarivā dassetuṃ “**taṇhāsampayuttasmi**”ntiādi vuttaṃ, taṃ suviññeyyameva. **Ārammaṇatoti** ārammaṇakaraṇato. “Evaṃrūpo siya”nti evaṃpavattassa chandarāgassa “evaṃvedano siya”nti evaṃpavattiyā abhāvato tattha tattheva natasaṅkhārā bhijjanti, tasmā rūpavedanārammaṇānaṃ chandarāgādīnaṃ abhāvato attheva **chandarāgavemattatā**. Chandarāgassa pahānādivasena chandarāgapaṭisaṃyuttassa apucchitattā, “**anusandhi na ghaṭiyatī**”ti vuttaṃ. **Kiñcāpi na ghaṭiyatī**ti aññasseva pucchitattā, tathāpi **sānusandhikāva pucchā**, tato eva **sānusandhikam viśajjanaṃ**. Tattha kāraṇamāha “**tesam tesa**”ntiādinā. Tena ajjhāsayānusandhivasena sānusandhikāneva pucchāvissajjanānti dasseti.

Puṇṇamasuttavaṇṇanā niṭṭhitā.

Khajjanīyavaggavaṇṇanā niṭṭhitā.

9. Theravaggo

1. Ānandasuttavaṇṇanā

83. **Paṭiccā**ti nissayaṃ katvā. “Esohamasmī”ti diṭṭhiggāho, “seyyohamasmī”ti mānaggāho ca taṇhāvaseneva hontīti taṇhāpi tathāpavattiyā paccayabhūṭā tathāpavatti evāti vuttaṃ “**asmīti evaṃ pavattaṃ taṇhāmānadiṭṭhipapañcattayaṃ hotī**”ti. Daharasaddo bāladārakepi pavattatīti tato viśesanatthaṃ “**yuvā**”ti vuttaṃ. Yuvāpi eko amaṇḍanasīloti tato viśesanatthaṃ “**maṇḍanakajātiko**”ti vuttaṃ. Tena mukhanimittapaccavekkhaṇassa sabbhāvaṃ dasseti. **Tanti** ādāsamaṇḍalaṃ olokayato. **Parammukhaṃ hutvā paññāyeyyāti** yadi puratthimadisābhimukhaṃ hutvā ṭhitam, mukhanimittampi puratthimadisābhimukhameva hutvā paññāyeyyāti attho. Yadi pi parassa sadisassa mukhaṃ bhavēyya,

tathāpi kāci asadisatā bhavēyyāti vuttaṃ “**vaṇṇādīhi asadisam hutvā paññāyeyyā**”ti. **Nibhāsarūpanti** paṭibhāsarūpaṃ. Nibhāsarūpaṃ tāva kamsādimaye pabhassare maṇḍale paññāyatu, udake pana kathanti “**kena kāraṇenā**”ti pucchati. Itaro “**mahābhūtānaṃ visuddhatāyā**”ti vadanto tatthāpi yathāladdhapabhassarabhāvenevāti dasseti. Ettha ca maṇḍana-jātiko puriso viya puthujjano, ādāsatalādayo viya pañcakkhandhā, mukhanimittaṃ viya “asmī”ti gahaṇaṃ, mukhanimittaṃ upādāya dissamānarūpādi viya “asmī”ti sati “ahasmī”ti “parosmī”tiādayo gāhavisesā. **Abhisametoti** abhisamito, ayameva vā pāṭho.

Ānandasuttavaṇṇanā niṭṭhitā.

2. Tissasuttavaṇṇanā

84. Madhurakaṃ vuccati kāye vibhāranti āha – “**madhurakajāto viyāti sañjātagarubhāvo viyā**”ti. Garubhāve sati lahutā anokāsāva, tathā mudutā kammaññatā cāti vuttaṃ “**akammañño**”ti. “Kāye”ti ānetvā vattabbaṃ. **Na pakkhāyantīti** pakāsā hutvā na khāyanti. Tenāha “**na pākāṭā hontī**”ti. **Upaṭṭhahantīti** upatiṭṭhanti. **Na dissatīti** gahaṇaṃ na gacchati. **Mahāvīcīkicchāti** aṭṭhavatthukā soḷasavatthukā ca vimati. **Na hi uppajjati** paripakkakusalāmūlattā.

Kāmānametaṃ adhivacananti padaṃ uddharitvā yena adhippāyena bhagavatā ninnaṃ pallalaṃ kāmānaṃ nidassanabhāvena ābhaṭaṃ, taṃ adhippāyaṃ vibhāvetuṃ “**yathā hī**”tiādi vuttaṃ.

Tissasuttavaṇṇanā niṭṭhitā.

3. Yamakasuttavaṇṇanā

85. Diṭṭhi eva **diṭṭhigataṃ** “gūthagataṃ muttagata”nti (ma. ni. 2.119; a. ni. 9.11) yathā. **Diṭṭhigataṃ nāma jātaṃ** khandhavinimuttassa sattassa gahitattā.

Kupiteti diṭṭhisāṅkhātarogena kupite. **Paggayhāti** tesam bhikkhūnaṃ santike viya therassa sārīputtassa sammukhā attano laddhiṃ paggayha “evaṃ khvāha”nti evaṃ nicchayena **vattum asakkonto**.

Anuyogavattaṃ nāma yena yutto, tassa attano gāhaṃ nijjhānakkhantiyāva yāthāvato pavedanaṃ. **Therassa anuyoge bhummanti** “taṃ kiṃ maññasi, āvuso yamakā”tiādinā therena kathitapucchāya bhummaniddeso. **Sace taṃ āvusoti idanti** “sace taṃ, āvuso”ti evamādikaṃ idaṃ vacanaṃ. **Etanti** yamakatheraṃ. **Aññanti** arahattaṃ. Vattabākārena vadanto atthato arahattaṃ byākaronto nāma hotīti adhippāyena vadati.

Etassa paṭhamamaggassāti etassa idāniyeva tiparivaṭṭadesanāvasāne tayā adhigatassa paṭhamamaggassa. **Catūhi yogehīti** attato piyato udāsīnato veritoti catūhipi uppajjanaanattahayogehi.

Upetīti taṇhupayadiṭṭhupayehi upādiyati taṇhādiṭṭhivatthum pappoti. **Upādiyatīti** daḷhaggāhaṃ gaṇhāti. **Adhitiṭṭhātīti** abhinivissa tiṭṭhati. Kinti? “**Attā me**”ti. **Paccatthikā me eteti** ete rūpavedanādayo pañcupādānakkhandhā mayhaṃ paccatthikā anattāhāvahattāti vipassanāññānena ñatvā. **Vipassanāya yojetvāti** vipassanāya khandhe yojetvā.

Yamakasuttavaṇṇanā niṭṭhitā.

4. Anurādhasuttavaṇṇanā

86. Tasseva vihārassāti mahāvane yasmim vihāre bhagavā viharati, tasseva vihārassa. **Imeti** aññatitthiyā. Yasmā ayam thero ṭhapanīyam pañham ṭhapanīyabhāvena na ṭhapesi, tasmā. Aññatitthiyā...pe... etadavocum. Tenāha “**ekadesena sāsanasamayam jānantā**”ti.

Gahitameva hoti tato pageva siddhattā. Tenāha “**tassa mūlattā**”ti. **Evanti** “**dukkhañceva pañnapemi, dukkhassa ca nirodha**”nti evam. **Vatṭavivaṭṭamevāti** pañcannaṃ pana khandhānaṃ samanupassanāya vasena vaṭṭam, “**evam passa**”ntiādinā vivaṭṭam kathitameva.

Anurādhasuttavaṇṇanā niṭṭhitā.

5. Vakkalisuttavaṇṇanā

87. Nagaramajjhe mahāābādho uppajjīti nagaramajjhena āgacchanto kammamuttāhāno mahanto ābādho uppajjati. **Samantato adhosīti** sabbabhāgena paripphandi. **Iriyāpatham yāpetunti** sayananisajjādibhedam iriyāpatham pavattetum. **Nivattantīti** osakkanti, parihāyantīti attho. **Adhigacchantīti** vaḍḍhanti. Satthu guṇasarīraṃ nāma navavidhalokuttaradhammādhigamamūlanti katvā vuttam “**navavidho hi...pe... kāyo nāmā**”ti, yathā sattānaṃ kāyo paṭisandhimūlako.

Kālasilāyam katavihāro **kālasilāvihāro. Maggavimokkhatthāyāti** aggamaggavimokkhādhigamāya. **Devatāti** suddhāvāsadevatā. **Alāmakam** nāma puthujjanakālakiriyāya abhāvato. Tenāha “**thero kirā**”tiādi. **Ekam dve ñāṇānīti** ekam dve paccavekkhaṇañāṇāni sabhāvato avassam uppajjanti, ayam dhammatā. Maggaphalanibbānapaccavekkhaṇāni taṃtaṃmaggavuttāhāne uppajjanti eva. **Ekam dveti** vacanaṃ uppanabhāvadassanattaṃ vuttam.

Dhūmāyanabhāvo dhūmākāratā, tathā **timirāyanabhāvo**.

Vakkalisuttavaṇṇanā niṭṭhitā.

6. Assajisuttavaṇṇanā

88. Passambhitvāti nirodhetvā. **No ca svāhanti** no ca su aham. **Parihāyi** kuppadhammattā. **Etanti** samādhimattasāraṃ, silamatte pana vattabbameva natthi. **Katham hotīti** katham abhinandanā hoti. **Dukkham patvāti** dukkhuppattihetu sukham pattheti “**evam me dukkhapariḷāho na bhavissati**”ti. **Yadaggenāti** yena bhāgena. “**Dukkham patthetiyeṇā**”ti vatvā tattha kāraṇamāha “**sukhavipariṇāmena hī**”tiādi. Sukhaviparivatte sukhavipariṇāmadukkham, tasmā sukham abhinandanto atthato dukkham abhinandati nāma.

Assajisuttavaṇṇanā niṭṭhitā.

7. Khemakasuttavaṇṇanā

89. Attaniyanti diṭṭhigatikaparikkappitassa attano santakam. Tenāha “**attano parikkhārajāta**”nti. **Taṇhāmāno adhigato** arahattassa anadhigatattā, no diṭṭhimāno adhigato, tathā kāmarāgabyāpādāpi. Anāgāmī kira khemakatthero, “**sakadāgāmī**”ti keci vadanti. **Sandhāvanikāyāti** sañcaraṇena. Tenāha “**punappunam gamanāgamanenā**”ti. **Catukkhattum gamanāgamanenāti** catukkhattum gamanena ca āgamanena ca. Tenāha – “**taṃ divasaṃ dviyojanaṃ addhānaṃ āhiṇḍī**”ti. **Ñatvāti** ajjhāsayaṃ ñatvā. **Theroti** khemakatthero.

Rūpameva asmīti vadatīti rūpakkhandhameva “**asmī**”ti gāhassa vatthum katvā vadati. **Adhigato** taṇhāmāno.

Aṇusahagatoti aṇubhāvaṃ gato. Tenāha “**sukhumo**”ti. **Tayo khārā viya tisso anupassanā** cittasaṃkilesassa visodhanato. **Sīlagandhādīhi** guṇagandhehi.

Kathetunti uddesavasena kathetuṃ. **Pakāsetunti** niddesavasena tamatthaṃ pakāsetuṃ. **Jānāpetunti** kāraṇavasena jānāpetuṃ. **Paṭiṭṭhāpetunti** kathāpetuṃ. **Vivaṇṇaṃ kātunti** udāharaṇaṃ vaṇṇetvā pākaṭaṃ kātuṃ. **Suvibhattaṃ kātunti** anvayato byatirekato suṭṭhu, vibhattaṃ kātuṃ. **Uttānakaṃ kātunti** upanayanigamehi tamatthaṃ vibhūtaṃ kātuṃ. **Aññena nīhārenā** vipassanāvimuttana cittaḥbhīṇhārena.

Khemakasuttavaṇṇanā niṭṭhitā.

8. Channasuttavaṇṇanā

90. Makkhīti guṇamakkhānalakkhaṇena makkhena samannāgato. **Paḷāsīti** yugaggāhalakkhaṇena paḷāsena samannāgato. **Etaṃ avocāti** “ovadantu maṃ...pe... passeyya”nti etaṃ avoca.

Theranti channattheraṃ. Attano duggahaṇena kañci upārambhampi kareyya. Tena vuttaṃ “**evaṃ kira nesam ahoṣī**”tiādi. **Niddosamevassa katvā**ti ādito anurūpattameva katvā saddhammaṃ kathessāmāti.

Paritassanā upādānanti bhayaaparitassanā diṭṭhupādānaṃ. Anattani sati anattakatāni kammāni kamattānaṃ phusissantīti bhayaaparitassanā ceva diṭṭhupādānañca uppajjati. **Paṭinivattatīti** yathāradhaviṇṇanāto paṭinivattati, nāsakkhīti attho. Kasmā panetassa vipassanamanuyuñjantassa evaṃ ahoṣīti tattha kāraṇaṃ vadati “**ayaṃ kirā**”tiādinā. **Evanti** “ko nu kho me attā”ti evaṃ na hoti. **Tāvaticā vissatthīti** “mayhaṃ dhammaṃ desetū”ti vuttavissāso atthīti attho. Idamaṃ kaccānasatthaṃ addasāti yojanā. “Dvayanissito, kaccāna, loko”tiādi **diṭṭhiviniveṭhanā**. “Ete te, kaccāna, ubho ante anupagamma”tiādi **buddhabaladīpanā**.

Channasuttavaṇṇanā niṭṭhitā.

9-10. Rāhulasuttādivaṇṇanā

91-92. Etāni suttāni. **Idhāgatānīti** imasmiṃ vagge ānītāni saṅgītikārehīti.

Rāhulasuttādivaṇṇanā niṭṭhitā.

Theravaggavaṇṇanā niṭṭhitā.

10. Pupphavaggo

1. Nadīsuttavaṇṇanā

93. Pabbateyyāti pabbatato āgatā. Tato eva **ohārinī**. Tenassā caṇḍasotataṃ dasseti. Dūraṃ gacchatīti **dūraṅgamā**. Tenassā mahogghataṃ dasseti.

Soteti vaṭṭasote. **Catūhi gāhehīti** “rūpaṃ attato samanupassatī”tiādinayappavattehi catūhi gāhehi. **Palujanattāti** chinnatā. **Sokādibyanappattīti** sokādiatthupatti.

Nadīsuttavaṇṇanā niṭṭhitā.

2. Pupphasuttavaṇṇanā

94. **Vivadatīti** vivādaṃ karoti. **Vadantoti** ayathāsabhāvena vadanto. **Vivadati** dhammatāya viruddhaṃ katvā vadati. **Lokadhammoti** lujjanasabhāvadhammo. Ko pana soti āha “**khandhapañcaka**”nti. Tenāha “**taṃ hī**”tiādi. **Kathaṃ karomīti** kena pakārenāhaṃ bālaṃ ajānantam karomi. Tenāha “**mayhaṃ hī**”tiādi. Tathā cāha “akkhāto vo mayā maggo”tiādi (dha. pa. 275). “**Tayo lokā kathitā**”ti vatvā taṃ vivarituṃ “**nāhaṃ, bhikkhave**”tiādimāha.

Pupphasuttavaṇṇanā niṭṭhitā.

3. Pheṇapiṇḍūpamasuttavaṇṇanā

95. Kenaci kāraṇena yujjhivā gahetuṃ na sakkāti **ayujjhā** nāma. **Nivattanaṭṭhāneti** udakappavāhassa nivattitaṭṭhāne.

Anusotāgamaneti anusotaṃ āgamanahetu, “anusotāgamanenā”ti vā pāṭho. **Anupubbena pavaḍḍhitvāti** tatha tatha uṭṭhitānaṃ khuddakamahantānaṃ pheṇapiṇḍānaṃ saṃsaggena pakārato vuddhiṃ patvā. **Āvaheyyāti** ānetvā vaheyya. **Kāraṇena upaparikkheyyāti** nāṇena vīmaṃseyya. “**Sāro nāma kiṃ bhaveyyā**”ti vatvā sabbaso tadabhāvaṃ dassento “**viliyivā viddhamseyyevā**”ti āha. Tena rūpampi nissāratāya bhijjatevāti dasseti. Yathā hi aniccatāya asāratāsiddhi, evaṃ asāratāyapi aniccatāsiddhīti aniccatāya eva niccasāraṃ thirabhāvasāraṃ dhuvasāraṃ sāmīnivāsīkārakabhūtassa attano vase pavattanampettha natthīti āha “**rūpampi...pe... nissāramevā**”ti. **Soti pheṇapiṇḍo. Gahitopi** upāyena **tamatthaṃ na sādheti** anarahattā. **Anekasandhighaṭito** tathā tathā ghaṭito hutvā.

Byāmamattampi etarahi manussānaṃ vasena. **Avassameva bhijjati** taraṅgabbhāhataṃ hutvā.

Tasmim tasmim udakabindumhi patite. **Udakatalanti** udakapiṭṭhiṃ. Aññato patantaṃ **udakabindum. Udakajallanti** santānakaṃ hutvā ṭhitaṃ udakamaṃ. Tañhi saṃkaḍḍhitvā tato udakaṃ puṭaṃ karoti, tasmim puṭe pubbuḷasamaññā. **Vatthunti** cakkhādivatthum. **Ārammaṇanti** rūpādiārammaṇaṃ. **Kilesajallanti** purimasiddhaṃ, paṭilabbhamānaṃ vā kilesamaṃ. **Phassasaṅghaṭṭananti** phassasamodhānaṃ. **Pubbuḷasadisā** muhuttaramaṇīyatāya. Yasmā ghammakāle sūriyātapasantāpābhiniḃbattarasmijālanipāte tādise bhūmipadese ito cito samuggatavātavegasamuddhaṭṭavirūḷhasaṅkhātesu paribbhamantesu aṇuparamāṇutajjārippakāresu bhūtasāṅghātesu marīcisamaññā, tasmā sabbaso sāravirahitāti vuttaṃ “**saññāpi asārakaṭṭhena marīcisadisā**”ti. Yasmā ca passantānaṃ yebhuyyena udakākārena khāyati, tasmā “gahetvā pivituṃ vā”tiādi vuttaṃ. **Nīlādiānubhavanatthāyāti** nīlādiārammaṇassa anubhavanatthāya. **Phandatīti** phandanākārappattā viya hoti appahīnataṇhassa puggalassa. **Vippalambheti** appahīnavipallāsaṃ puggalaṃ. Tenāha “**idaṃ nīlaka**”ntiādi. Saññāvipallāsato hi cittavipallāso, tato diṭṭhivipallāsoti. **Vippalambhanenāti** vippakāravaseneva ārammaṇassa lambhanena. Vippakāravasena hi etaṃ lambhanaṃ, yadidaṃ anudakameva udakaṃ katvā dassanaṃ anagarameva nagaraṃ katvā gandhabbanāṭakādidassanaṃ.

Kukkukaṃ vuccati kadalikkhandhassa sabbapattavaṭṭīnaṃ abbhantare daṇḍakanti āha “**akukkukajātanti anto asaṅjātaghanadaṇḍaka**”nti. **Na tathā hotīti** yadatthāya upaṇītaṃ, tadatthāya na hoti. **Nānālakkhaṇoti** nānāsabhāvo. **Saṅkhārakkhandhovāti** eko saṅkhārakkhandhotveva vuccati.

Assāti purisassa. **Apagatapaṭalapiḷakanti** apagatapaṭaladosaṅceva apagatapiḷakadosaṅca. **Asārabhāvadassanasamatthanti** asārassa asārabhāvadassanasamatthaṃ. **Ittarāti** parittakālā, na ciraṭṭhitikā. Tenāha “**lahupaccupaṭṭhānā**”ti. **Aññadeva ca āgamanakāle cittanti** idaṅca oḷārikavaseneva vuttaṃ. Tathā hi ekaccharakkhaṇe anekakoṭīsatasahassasaṅkhāni cittāni uppajjitvā nirujjhanti. Māyāya dassitaṃ rūpaṃ **māyāti** vuttaṃ. **Yaṃkiñcideva** kapālīṭṭhakapāsānavālikādiṃ.

Vañcetiti asuvaṇṇameva suvaṇṇanti, amuttameva muttātiādinā vañceti. Nanu ca saññāpi marīci viya vippalambheti vañceti, idampi viññāṇaṃ māyā viya vañceti ko imesaṃ visesoti? Vacanattho nesaṃ sādharmaṇo. Tathāpi saññā anudakameva udakaṃ katvā gāhāpentī, apurisaññeva purisaṃ katvā gāhāpentī vippalambhanavasena appavisayā, viññāṇaṃ pana yaṃ kiñci atamsabhāvaṃ taṃ katvā dassenti māyā viya mahāvisayā. Tenāha “**yaṃkiñcidevā**”tiādi. **Evampīti** ativiya lahu-parivattibhāvenapi māyāsadisanti.

Desitāti evaṃ desitā pheṇapiṇḍādiupamāhi.

Bhūri vuccati pathavī, saṅhaṭṭhena vipulaṭṭhena ca bhūrisadisapaññatāya **bhūripaṇṇo**. Tenāha “**saṅhapaññena cevā**”tiādi. **Kimigaṇḍānanti ādi**-saddena anekagijjhādike saṅgaṇhāti. **Paveṇīti** dhammapabandho. **Bālāpinī** “ahaṃ mamā”tiādinā. **Sesadhātuyo gahetvā bhijjati** ekuppādekanirodhattā, vatthurūpanissayapaccayattā “aya”nti na visuṃ gahitaṃ. **Vadhabhāvato** vadhasa maraṇassa atthibhāvato. **Saraṇanti** paṭisaraṇaṃ.

Pheṇapiṇḍūpamasuttavaṇṇanā niṭṭhitā.

4-6. Gomayapiṇḍasuttādivaṇṇanā

96-98. Sassataṃ sabbakālaṃ yāva kappavuṭṭhānā hontīti **sassatiyo**, sineruādayo. Tāhi **samaṃ** samakālaṃ. **Anenāti** bhagavatā. **Nayidanti** ettha **ya**-kāro padasandhikaro, **idanti** nipātapadaṃ. Taṃ pana yena yena sambandhīyati, taṃ tilingova hotīti “**ayaṃ maggabrahmacariyavāso**”ti vuttaṃ. “**Na paññāyeyyā**”ti vatvā tamatthaṃ vivaritaṃ “**maggo hī**”tiādi vuttaṃ. **Vivaṭṭentoti** vinivaṭṭento appavattiṃ karonto.

Rājadhānīti rañño nivāsanagaraṃ. **Suttamayanti** cittavaṇṇavaṭṭikāmayam.

Gomayapiṇḍasuttādivaṇṇanā niṭṭhitā.

7. Gaddulabaddhasuttavaṇṇanā

99. **Yaṃ mahāsamuddoti** ettha **yanti** samayassa paccāmasanaṃ. Bhummatthe cetam paccattavacananti āha “**yasmiṃ samaye**”ti. So ca samayo ayanti dassento “**pañcame sūriye utthite**”ti āha. **Paricchedaṃ na vadāmi** paricchedakārikāya aggamaggavijjāya anadhigatattā. **Sunakho viya vaṭṭanissito bālo** asavasabhāvato. **Gaddulo viya diṭṭhibandho.** **Sakkāyo** tassa asavasabhāvato. **Puthujjanassa sakkāyānuparivattananti** “santāne sattavohāro”ti taṃ tato aññaṃ katvā bhedenā niddeso.

Gaddulabaddhasuttavaṇṇanā niṭṭhitā.

8. Dutiyagaddulabaddhasuttavaṇṇanā

100. **Diṭṭhigaddulanissitāyāti** saha-jātādipaccayavasena diṭṭhigaddulanissitāya **nissāyeva pavattati** tato attānaṃ vivecetum asakkuṇeyyattā. **Cittasamkilesenevāti** dasavidhakilesavatthavasena cittassa samkiliṭṭhabhāvena. Ariyamaggādhigamanena **cittassa vodānattā** vodāyanti **visujjhanti**.

Vicaraṇacittanti gahetvā vicaraṇavasena vicaraṇacittaṃ. **Saṅkhānāmāti** evaṃnāmakā. **Brāhmaṇapāsaṇḍikāti** jātiyā brāhmaṇā, channavutiyā pāsaṇḍesu taṃ saṅkhāsaññitaṃ pāsaṇḍaṃ paggayha vicaraṇakā. **Paṭakoṭṭhakanti** dussāpaṇakaṃ. **Dassenti**ti yathāgatikkammavipākacittataṃ dassentā. **Taṃ cittanti** taṃ paṭakoṭṭhakacittaṃ **gahetvā vicaranti.** **Cintetvā katattāti** “imassa rūpassa

evaṃ hatthapādā, evaṃ mukhaṃ likhitabbaṃ, evaṃ ākāravatthaggaṇāni, evaṃ kiriyaṅviseṣā, evaṃ kiriyaṅvibhāgaṃ, sattaviseṣānaṃ vibhāgaṃ kātabbaṃ”nti tassa ubbattanakhipanapavattanādiipayojanañcāti sabbametaṃ tathā cintetvā katattā **cittena** manasā **cintitaṃ nāma**. **Upāyapariyesanacittanti** “hatthapādā evaṃ likhitabbaṃ”tiādinaṃ yathāvuttaupāyassa ceva pubbe pavattassa bhūmiparikammavaṇṇadhātusammāyojanupāyassa ca vasena pavattaṃ cittaṃ. **Tatopi cittataranti** tato cittakammatoṇi cittataraṃ cittakārena cintitappakārānaṃ sabbesaṃyeva cittakamme anipphajjanato. **Kammacittena**ti kammaviññāṇena. **Kammacittena**ti vā kammassa cittaḥāvena. So kammassa vicittabhāvo taṇhāvasena jāyatīti veditabbo. Svāyamattho **aṭṭhasālīnīkāyaṃ** vibhāvito. **Evaṃ citta**ti evaṃ cittaṃpaviseṣā. **Yoniṃ upaneti**ti taṃ taṃ aṇḍajātibhedam yoniviseṣam pāpeti vaṇṇaviseṣo viya phalīkamaṇīkaṃ. Na hi viseṣā hitavicittasāmatthiyakammaṃ yoniṃ upaneti, tassa tassa vipākuppattiyā paccayo hoti. **Yonimūlako tesam cittaḥāvoti** yaṃ yaṃ yoniṃ kammaṃ satte upaneti, taṃtaṃyonimūlako tesam sattānaṃ cittaṃvicittabhāvo. Tenāha “**yonipagatā**”tiādi. **Sadisacittāva** sadisacittabhāvā eva. **Itti**tiādi vuttasseva atthassa uppaṭṭipāṭiyā nigamaṇaṃ.

Tiracchānagatacittabhāvato cittaṃseva saviseṣam cittaḥāvakaṇaṇaṃ dassetuṃ “**apicā**”tiādi vuttaṃ. Tattha cittaṃ nāmetaṃ cittataraṃeva veditabbanti sambandho. **Sahajātadhammacittatāyāti** rāgādisaddhādidhammavicittabhāvena. **Bhūmicittatāyāti** adhiṭṭhānacittatāya. Kammanānattaṃ mūlaṃ kāṇaṇaṃ etesanti **kammanānattamūlakā**, tesam. **Liṅganānattaṃ** itthiliṅgādinānattavasena ceva taṃtaṃsaṇṭhānānānattavasena ca veditabbaṃ. **Saññānānattaṃ** itthipurisadevamanussādisaññānānattavasena. **Vohāranānattaṃ** tissotiādivohāranānattavasena. **Cittānaṃ** vicittānaṃ. Taṃtaṃvohāranānattampi citteneva paññāpiyati. Raṅgajātarūpasamuṭṭhāpanādinā vatthaṃ rañjayatīti **rajako**, vaṇṇakāro. Puthujjanassa attabhāvasaññitarūpasamuṭṭhāpanatā niyatā ekantikāti puthujjanaggahaṇaṃ. “Abhirūpaṃ rūpaṃ samuṭṭhāpeti”ti ānetvā sambandho.

Dutiyaḡaddulabaddhasuttavaṇṇanā niṭṭhitā.

9. Vāsijaṭasuttavaṇṇanā

101. Atthassāti hitassa. **Asādhikā** “bhāvanānuyogaṃ ananuyuttassā”ti ananuyuttassa vuttatā. **Itarāti** sukkaṃpakkaḡupamā. **Sādhikā** bhāvanāyogassa anuyuttatā. Tañhi tassa sādhikā veditabbā. **Sambhāvanattheti** paramatthasambhāvane. Evañhi kaṇḡhapakkhepi apisaddaggahaṇaṃ samatthitaṃ hoti. **Sambhāvanattheti** vā parikappanattheti attho. Saṅkhātabbe atthe aniyamato vuccamāne saṅkhāto aniyamattho vāsaddo vattabboti “**aṭṭha vā**”tiādi vuttaṃ. **Ūnādhikānīti** ūnānīpi adhikānīpi kiñcāpi hontī, ekaṃso pana gaḡetabboti “**aṭṭha vā dasa vā dvādasā vā**”ti vuttaṃ. Evaṃ vacanaṃ sandhāya “**vacanasiliṭṭhatāyā**”tiādi vuttaṃ. Pādanakhasikhāhi akopanasena **sammā adhisayitāni**. Utunti uṇḡhautuṃ kāyusmāvasena. Tenāha “**usmīkatāni**”ti. **Bhāvītānīti** kukkuṭavāsānāya vāsītāni. Sammāadhisayanāditividhakiriyaṅkāṇaṇena imaṃ appamādaṃ katvā. **Sotthinā abhinibbhijjuntī** anantarāyena tato nikkhamituṃ. Idāni tamatthaṃ vivaranto “**te hī**”tiādimāha. **Sayampīti** aṇḡāni. **Pariṇāmaṃti** pariṇāmaṃ bahinikkhamanayoggaṃtaṃ.

Tanti opammasamṡaṭṭipādanaṃ. **Evanti** idāni vuccamānākārena. **Atthenāti** upameyyatthena. **Samsanditvā** sammā yojetvā. Sampayuttadhammavasena ñāṇassa tikkhātibhāvo veditabbo. Ñāṇassa hi sabhāvato satīnepakkato ca tikkhābhāvo, samādhivasena sūrabhāvo, saddhāvasena vipasannabhāvo, vīriyavasena pariṇāmaḡbhāvo. **Pariṇāmakāloti** balavavipassanākālo. **Vaḡḡhitakāloti** vuṭṭhānagāminīvipassanākālo. Anulomaṭṭhānassa hi vipassanā gaḡitagabbhā nāma tadā maggaḡabbhassa gaḡitattā. **Tajjātikanti** tassa vipassanānuyogassa anurūpaṃ. **Satthāpi gāthāya avijjaṇḡḡakosam paharati** bhindāpeti.

Olambakasaṅkhātanti olambakasuttasaṅkhātaṃ. **Palanti** tassa suttassa nāmaṃ. **Dhāretvāti** dārūnaṃ heyyādiḡānanatthaṃ upanetvā. **Dārūnaṃ gaṇḡam haratīti palagaṇḡdoti** etena palena gaṇḡḡahāro “**palagaṇḡdo**”ti pacchīmapade uttarapāḡalopena niddesotī dassetī. **Gahaṇaṭṭhāneti** hatthena

gahetabbaṭṭhāne. Sammadeva khepīyanti etena kāyaduccarītādīnīti **saṅkhepo**, tena. Vipassanaṃ anuyuñjantassa puggalasseva divase divase āsavānaṃ parikkhaya idha “**vipassanāyānisamso**”ti adhippeto. **Hemantikena** karaṇabhūtena. Bhummatthe vā etaṃ karaṇavacanāṃ, hemantiketi attho. **Paṭippassambhantī** paṭippassaddhaphalāni honti. Tenāha “**pūtikāni bhavantī**”ti.

Mahāsamuddo viya sāsanaṃ sabhāvagambhīrabhāvato. **Nāvā viya yogāvacarō** mahoghuttaraṇato. **Pariyādānaṃ viyāti** parito aparipūraṇaṃ viya. **Khajjamānānanti** saṅkhādantena viya udakena khepiyamānānaṃ bandhanānaṃ. **Tanubhāvoti** pariyuṭṭhānuppattiyā asamatthatāya dubbalabhāvo. **Vipassanāñāpītipāmojjehīti** vipassanāñānasamuṭṭhitehi pītipāmojjehi. **Okkhāyamāne pakkhāyamāneti** vividhapaṭipattiyā ukkhāyamāne paṭisaṅkhānupassanāya pakkhāyamāne. **Dubbalatā dīpitā** “appakasireneva saṃyojanāni paṭippassambhanti, pūtikāni bhavantī”ti vuttatā.

Vāsijaṭasuttavaṇṇanā niṭṭhitā.

10. Aniccasaññāsuttavaṇṇanā

102. Bhāventassāti vipassanāya maggaṃ bhāventassa **uppannasaññā**. Tenāha – “**sabbaṃ kāmarāgaṃ pariyādiyatī**”tiādi. **Santānetvāti** kasaṇaṭṭhānaṃ sabbaso vitanetvā pattharitvā. **Kilesāti** upakkilesappabhedā kilesā. **Aniccasaññāñāṇenāti** aniccasaññāsahagatena ñāṇena.

Lāyananti lāyanaṃ viya nayaṇaṃ viya nicchoṭanaṃ viya ca **aniccasaññāñāṇaṃ**. **Iminā atthenāti** iminā yathāvuttana pāḷiyā atthena, **upamā saṃsandetabbāti** ettha pabbajalāyako viya yogāvacarō. Lāyanādīnā tassa tattha katakiccatāya parituṭṭhi viya imassa kilese sabbaso chinditvā phalasaṃpattisukhena kālassa vītināmanā.

Kūṭaṃ gacchantīti pārimantena kūṭaṃ gacchanti. **Kūṭaṃ pavisaṇabhāvenāti** kūṭacchiddaṃ aggena pavisaṇavasena. **Samosarivāti** chidde anupavisaṇavasena ca āhacca avaṭṭhānena ca samosarivā ṭhitā. **Kūṭaṃ viya aniccasaññā** aniccānupassanāvasena avaṭṭhānassa mūlabhāvato. **Gopānasiyo viya catubhūmakakusalā dhammā** aniccasaññāmūlakattā. **Kūṭaṃ aggaṃ** sabbagopānasīnaṃ tathāadhiṭṭhānassa padhānakāraṇattā. **Aniccasaññā aggāti** etthāpi eseva nayo. **Aniccasaññā lokiyāti** idaṃ aniccasaññānupassanaṃ sandhāya vuttaṃ. Aniccānupassanāmukhena adhigataariyamagge uppannasaññā aniccasaññāti vattabbaṭṭaṃ labhatīti “aniccasaññā, bhikkhave, bhāvitā bahulīkatā sabbaṃ kāmarāgaṃ pariyādiyatī”tiādi vuttaṃ. Tathā hi **dhammasaṅghe** (dha. sa. 357, 360) “yasmaṃ samaye lokuttaraṃ saññaṃ bhāvetī”tiādinā saññāpi uddhaṭā. **Sabbāsu upamāsūti** mūlasantānaupamādīsū pañcasu upamāsū. **Purimāhīti** kassakapabbajalāyanaambapiṇḍiupamāhi **aniccasaññāya kiccaṃ** vuttaṃ mūlasantānapadālanapabbajalāyanaavaṇṭacchedanapadesena aniccasaññāya paṭipakkhacchedanassa dassitattā. **Pacchimāhi balaṃ** dassitaṃ paṭipakkhātībhāvassa jotitattā.

Aniccasaññāsuttavaṇṇanā niṭṭhitā.

Pupphavaggavaṇṇanā niṭṭhitā.

Majjhimaṇṇāsako samatto.

11. Antavaggo

1. Antasuttavaṇṇanā

103. Aññamaññaṃ asaṃsaṭṭhabhāvena eti gacchatīti **anto**, bhāgoti āha “**antāti koṭṭhāsā**”ti.

“Sakkāyanirodhanto”ti nirodhapaccayassa gahitattā vuttaṃ “**catusaccavasena pañcakkhandhe yojetvā**”ti. **Antoti...pe... ajjhāsayavasena vuttaṃ** yathānulomadesanattā suttantadesanāya.

Antasuttavaṇṇanā niṭṭhitā.

2-3. Dukkhasuttādivaṇṇanā

104-105. Dutiyampīti api-saddo sampiṇḍanattho. Tena na kevalaṃ paṭhamasuttameva, atha kho dutiyampīti.

Tatiyampi tathevāti iminā “pañcakkhandhe catusaccavasena yojetvā”ti idaṃ upasaṃharati.

Dukkhasuttādivaṇṇanā niṭṭhitā.

4. Pariññeyyasuttavaṇṇanā

106. Pariññeyyeti ettha tisso pariññā ñātapariññā, tīraṇapariññā, pahānapariññāti. Tāsu **ñātapariññā** yāvadeva tīraṇapariññatthā. **Tīraṇapariññā ca** yāvadeva pahānapariññatthāti. Tattha ukkaṭṭhāya pariññāya kiccadassanavasena atthaṃ dassento “**pariññeyyeti pari jānitabbe samatikkamitabbe**”ti, pahātabbete attho. Tenāha bhagavā – “katamā ca, bhikkhave, pariññā? Rāgakkhayo, dosakkhayo, mohakkhayo”ti, tasmā **samatikkamanti**, samatikkantaṃ pahānassa upāyaṃ. **Samatikkamitvā ṭhitanti** pajahitvā ṭhitanti ayamettha attho.

Pariññeyyasuttavaṇṇanā niṭṭhitā.

5-10. Samaṇasuttādivaṇṇanā

107-112. Cattāri saccāni kathitāni assādādīnaṃ samudayādīnañca desitattā.

Kilesappahānaṃ kathitaṃ rāgappahānassa jotitattā.

Samaṇasuttādivaṇṇanā niṭṭhitā.

Antavaggavaṇṇanā niṭṭhitā.

12. Dhammakathikavaggo

1-2. Avijjāsuttādivaṇṇanā

113-114. Yāvatāti yasmā. **Imāya...pe... samannāgatoti** “idaṃ dukkhanti yathābhūtaṃ nappajānāti”tiādīnā nayena vuttāya catūsu ariyasaccesu aññāṇasabhāvāya avijjāya sammohena samannāgato. **Ettāvatāti** ettakena kāraṇena **avijjāgato** samaṅgībhūtena upagato, avijjāya vā upeto nāma hoti.

Dutiyepīti vijjāsutte. “Vijjāvasena desanā”ti ayameva visesoti āha “**eseva nayo**”ti.

Avijjāsuttādivaṇṇanā niṭṭhitā.

3. Dhammakathikasuttavaṇṇanā

115. Paṭhamena dhammakathiko kathito “dhammaṃ desetī”ti vuttattā. **Dutiyena sekhabhūmi** kathitā “paṭipanno hotī”ti vuttattā, **tatiyena asekkhabhūmi** kathitā “anupādāvimutto hotī”ti vuttattā. **Dhammakathikaṃ pucchitena** bhagavatā. **Visesetvāti** dhammakathikabhāvato visesetvā ukkaṃsetvā. **Dve bhūmiyoti** sekkhāsekkhabhūmiyo.

Dhammakathikasuttavaṇṇanā niṭṭhitā.

4. Dutiyadharmakathikasuttavaṇṇanā

116. Tīṇi vissajjanānīti yathāpucchamaṃ tīṇi vissajjanāni.

Dutiyadharmakathikasuttavaṇṇanā niṭṭhitā.

5-9. Bandhanasuttādivaṇṇanā

117-121. Tīraṃ vuccati vaṭṭaṃ orimatīranti katvā. Tenāha “athāyaṃ itarā pajā, tīramevānudhāvātī”ti (dha. pa. 85). **Pāraṃ vuccati nibbānaṃ** saṃsāraṃ pārimanti katvā. **Baddhoti** anusayappahānassa akatattā **kilesabandhanena baddho**, sukkaṃpakkhepi diṭṭhisamanupassanāya rūpādibandhanassa paṭikkhepamattameva vuttaṃ, na vimokkanti adhippāyo. **Imasmiṃ sutte vaṭṭadukkhaṃ kathitanti** “tīradassī pāradassī, parimutto so dukkhasmāti vadāmī”ti āgatattā vaṭṭavivaṭṭaṃ kathikanti vattuṃ sakkā.

Chaṭṭhādīni uttānatthāneva heṭṭhā vuttanayattā.

Bandhanasuttādivaṇṇanā niṭṭhitā.

10. Sīlavantasuttavaṇṇanā

122. Ābādhaṭṭhenāti ādito uppattito paṭṭhāya bādhanatthena rujanatthena. **Antodosatthēnāti** abbhantare eva dussanatthena kuppānatthena. **Khaṇanatthēnāti** sasanatthena. **Dukkhatthēnāti** dukkhamattā dukkhabhāvena. Dukkhañhi loke “agha”nti vuccati ativiya hananato. **Visabhāgaṃ ... pe... paccayatthēnāti** yathāpavattamānānaṃ dhātādīnaṃ visabhāgabhūtamahābhūtasamuṭṭhānassa ābādhasa paccayabhāvena. **Asakatthēnāti** anattaniyato. **Palujjanatthēnāti** pakārato bhijjanatthena. **Sattasuññatāṭṭhenāti** sattaṃsāṅkhātaattasuññatāṭṭhenā. **Attābhāvenāti** diṭṭhigatikaparikkappitassa attano abhāvena. **Suññato anattatoti** ettha “parato”ti padassa saṅgaho kātabbo, tasmā “**dvīhi anattamanasikāro**”ti vattabbaṃ.

Sīlavantasuttavaṇṇanā niṭṭhitā.

11. Sutavantasuttavaṇṇanā

123. Tathā ekādasameti ettha **tathā**-saddena “uttānamevā”ti idaṃ ākaḍḍhati. **Idhāti** ekādasame. Kammatthānassa uggahadhāraṇaparicayamanasikāravasena pavattañāṇaṃ kammatthānasutavasena nipphajjanato “**suta**”nti vuttaṃ.

Sutavantasuttavaṇṇanā niṭṭhitā.

12-13. Kappasuttādivaṇṇanā

124-125. Rāhulovādasadisānīti rāhulovādasutte (ma. ni. 2.113 ādayo) āgatasuttasadisāni.

Kappasuttādivaṇṇanā niṭṭhitā.

Dhammakathikavaggavaṇṇanā niṭṭhitā.

13. Avijjāvaggo

1-10. Samudayadhammasuttādivaṇṇanā

126-135. Imasminti avijjāvagge. Catusaccameva kathitaṃ, tasmā heṭṭhā vuttanayattā uttānamevāti adhippāyo.

Samudayadhammasuttādivaṇṇanā niṭṭhitā.

Avijjāvaggavaṇṇanā niṭṭhitā.

14. Kukkuḷavaggo

1-14. Kukkuḷasuttādivaṇṇanā

136-149. Anto aggi mahanto chārikarāsi, tattha ukkuḷavikulato akkamantaṃ yāva kesaggaṃ anudahatāya kucchitaṃ kuḷanti kukkuḷaṃ, rūpavedanādi pana tatopi kañci kālaṃ anudahanato mahāpariḷāhanaṭṭhena ca kukkuḷaṃ viyāti **kukkuḷaṃ. Aniccalakkhaṇādīnī** aniccadukkhānattalakkhaṇāni.

Kukkuḷasuttādivaṇṇanā niṭṭhitā.

Kukkuḷavaggavaṇṇanā niṭṭhitā.

15. Diṭṭhivaggo

1-9. Ajjhattasuttādivaṇṇanā

150-158. Paccayaṃ katvāti abhinivesapaccayaṃ katvā. Ādisaddena micchādiṭṭhisakkāyadiṭṭhiattānudiṭṭhi saññojanābhinivesa-vinibandhaajjhosānāni saṅgaṇhāti. Tattha **abhinivesā** taṇhāmānadiṭṭhiyo. **Vinibandhā** ‘kāye avītarāgo hoti’ tiādīnā (dī. ni. 3.320; ma. ni. 1.186) āgatacetasovinibandhā. **Ajjhosānāti** taṇhādiṭṭhijjhosānāni. Sesāni suviññeyyāneva.

Ajjhattasuttādivaṇṇanā niṭṭhitā.

10. Ānandasuttavaṇṇanā

159. Dharamānakāleti jīvamānakāle. **Pahānaṃ apassantoti** therassa kira bhagavati pemaṃ adhimattaṃ. **Cittaṃ gaṇhissāmīti** cittaṃ ārādhessāmi. **Gantabbaṃ hoti**, tasmā sapalibodho. **Cittaṃ sampahaṃsamānoti** cittassa vibodhano. **Vimutti...pe... jāto** āyatīṃ paṭivedhapaccayattā, na pana tadā visesāvahabhāvā nibbedhabhāgiyo.

Ānandasuttavaṇṇanā niṭṭhitā.

Diṭṭhivaggavaṇṇanā niṭṭhitā.

Uparipaṇṇāsako samatto.

Sāratthappakāsiniyā saṃyuttanikāya-aṭṭhakathāya

Khandhasaṃyuttavaṇṇanāya līnatthappakāsanā samattā.

2. Rādhasaṃyuttaṃ

1. Paṭhamavaggo

1. Mārasuttavaṇṇanā

160. Mārasaddoyaṃ bhāvasādhanoti dassento “**māro vā assāti maraṇaṃ vā bhaveyyā**”ti āha. **Māretāti** maritabbo māraṃ maraṇaṃ etabboti āha “**māretabbo**”ti. **Anupādānibbānatthāti** phalavimuttisaṅkhātā arahato arahantatā nāma yāvadeva anupādānibbānatthā. **Nibbānabbhantareti** anupādānibbānādhiḡamassa abbhantare tato orameva idaṃ maggaṃ brahmacariyaṃ vussati, na tato paraṃ. **Assāti** brahmacariyassa.

Mārasuttavaṇṇanā niṭṭhitā.

2-10. Sattasuttādivaṇṇanā

161-169. **Laggapucchāti** lagganassa bajjhanassa pucchā. Yadi rūpādīsū sattattā satto, khīṇāsavā kathaṃ sattāti? Sattabhūtapubbāti katvā. **Kīlāvigamanti** kīlāya apanayanaṃ oramaṇaṃ. Yantarajju viya bhavapabandhassa nayanato **bhavarajjūti** taṇhā vuttā.

Sattasuttādivaṇṇanā niṭṭhitā.

Paṭhamavaggavaṇṇanā niṭṭhitā.

2. Dutiyavaggo

1-12. Mārasuttādivaṇṇanā

170-181. **Rūpādivinimuttaṃ maraṇaṃ nāma natthi** rūpādīnaṃyeva vibhave maraṇasamaññāti. **Maraṇadhammo** vināsabhāvo.

Mārasuttādivaṇṇanā niṭṭhitā.

Dutiyavaggavaṇṇanā niṭṭhitā.

3-4. Āyācanavaggādi

1-11. Mārādisuttaekādasakavaṇṇanā

182-205. **Sukhumaṃ kāraṇaṃ upaṭṭhāti**, tenesa thero paṭibhāneyyakānaṃ etadagge ṭhapito. **Vimutti-paripācanīyadhammaseneva**, na paṭivedhāvahabhāvena.

Mārādisuttaekādasakavaṇṇanā niṭṭhitā.

Āyācanavaggādivaṇṇanā niṭṭhitā.

Sārattappakāsiniyā saṃyuttanikāya-aṭṭhakathāya

Rādhasaṃyuttavaṇṇanāya līnatthappakāsanā samattā.

3. Diṭṭhisamuttam

1. Sotāpattivaggo

1. Vātasuttavaṇṇanā

206. Na ete vātāti ye ime rukkhasākhādibhañjanakarā, ete sattakāyattā vātā nāma na honti. Te hi niccā dhuvā sassatā. Tenāha “**vāto panā**”tiādi. Tena sattu kāyesu catuttham kāyamāha. Rukkhasākhādibhañjanako **eso vātaleso nāma**, vātasadisoti attho. **Esikatthambho viyāti** iminā niccalabhāvameva dasseti, **pabbatakūṭam viyāti** iminā pana sassatisamaṃvāpi. Ayañhi vāyu kāyassa niccataṃ abhinivissa ṭhito “mā ca aniccatā paro hotū”ti na vātā vāyantīti bādhati. Esa nayo **nadiyo sandantīti**ādīsu. **Udakaṃ panāti** dutiyaṃ kāyaṃ sandhāyāha. **Gabbho pana na nikkhamati** kūṭaṭṭhādibhāveneva tassa labbhanato. **Neva te uđenti** yathā vātā, evaṃ tiṭṭhanato lokassa pana tathā matimattanti adhippāyo.

Vātasuttavaṇṇanā niṭṭhitā.

2-4. Etaṃmamasuttādivaṇṇanā

207-209. Diṭṭham rūpāyatanam cakkhunā daṭṭhabbato. **Sutam saddāyatanam** sotena sotabbato. **Mutam gandhāyatanādi** tividham sampattaḡāhīhi ghānādīhi patvā gahetabbato. **Avasesāni** cakkhādīni **sattāyatanāni viññātam nāma** kevalam manoviññāṇena vijānitabbato. **Pattanti** anuppattam, yaṃ kiñci pāpuṇitabbam pariyesitvā gavesitvā sampattanti anuppattam. **Pariyesitanti** pariyaṭṭham. **Cittena anusañcaritanti** manasā cintitam. “Pattam pariyesita”nti etasmim padadvaye catukkam sambhavatīti tam dassetvā tassa vasena pattapariyesitapadāni, tato manasā anuvaritañca nīharitvā dassetuṃ “**lokasmim hī**”tiādi vuttam. Tattha **pariyesitvā pattam nāma** pariyesanāya pariggāhabhāvato. **Pariyesitam nāma** kevalam pariyesitamevāti katvā pariyesitvā pattassa manussānuvaritassa vuttattā. Paṭhamavikappe sañkaro atthīti asañkarato ca dassetuṃ “**atha vā**”tiādi vuttam. **Sabbanti** viññātādi. Tañhi manoviññāṇena gahitattā manasā anuvaritam nāma na diṭṭham sutam mutam.

Etaṃmamasuttādivaṇṇanā niṭṭhitā.

5. Natthidinnasuttavaṇṇanā

210. Dinnanti deyyadhammasīsenā dānam vuttanti āha “**dinnassa phalābhāvaṃ sandhāyā**”ti, dinnam pana annādivattham katham paṭikkhipanti. Esa nayo “**yiṭṭham huta**”nti etthāpi. **Mahāyāgoti** sabbasādhāraṇam mahādānam. **Paheṇakasakkāroti** pāhunakānam kātabbasakkāro. **Phalanti** ānisaṃsaphalam nissandaphalañca. **Vipākoti** sadisaphalam. **Paraloke ṭhitassa ayaṃ loko natthīti** paraloke ṭhitassa kammunā laddhabbo ayaṃ loko na hoti. **Idhaloke ṭhitassapi paraloko natthīti** idhaloke ṭhitassa kammunā laddhabbo paraloko na hoti. Tattha kāraṇamāha – “**sabbe tattha tattheva ucchijjanti**”ti. Ime sattā yattha yattha bhava yonīādīsu ca ṭhitā, tattha tattheva ucchijjanti nirudayavināsavasena nassanti. **Phalābhāvavasenāti** mātāpitūsu sammāpaṭipattimicchāpaṭipattīnam phalassa abhāvavasena “natthi mātā, natthi pitā”ti vadanti, na mātāpitūnam, nāpi tesu idāni kariyamānasakkārāsakkārānam abhāvavasena tesam lokapaccakkhattā. Pubbuḷakassa viya imesam

sattānaṃ uppādo nāma kevalo, na bhavato cavitvā āgamanapubbakoti dassanattamaṃ “natthi sattā opapātikā”ti vuttanti āha – “**cavitvā uppajjanakasattā nāma natthī**”ti. Samaṇena nāma yāthāvato jānantena kassaci akathetvā saññatena bhavittabbaṃ, aññathā āhopurisikā nāma siyā. Kiñhi paro parassa karissati, tathā ca attano sampādanassa kassaci avassayo eva na siyā tattha tattheva ucchijjanatoti āha “**ye imaṅca...pe... pavedenti**”ti.

Catūsu mahābhūtesu niyuttoti **cātumahābhūtikō**. Yathā pana mattikāya nibbattaṃ bhājanam mattikāmayam, evamayam catūhi mahābhūtehi nibbattoti āha “**cātumahābhūtamayo**”ti. **Ajjhattikā pathavīdhātūti** sattasantānagatā pathavīdhātu. **Bāhiram pathavīdhātunti** bahiddhā mahāpathaviṃ. **Anuyātīti** tassa anurūpabhāvena yāti upeti. **Upagacchatīti** pubbe bāhirapathavīkāyato tadekadesabhūtā pathavī āgantvā ajjhattikabhāvappattiyā sattabhāvena saññhitā idāni ghaṭṭāpīpathavī viya tameva bāhirapathavīkāyam upeti upagacchati, sabbaso tena nibbisesattaṃ ekībhāvameva gacchati attho. **Āpādisupī eseva nayoti** ettha pajjunna mahāsamuddato gahitāpo viya vassodakabhāvena punapi mahāsamuddam, sūriyamaṣito gahitaindaggisaṅkhātatejo viya punapi sūriyamaṣim, mahāvāyukhandhato niggatamahāvāyo viya tameva vāyukhandham upeti upagacchati diṭṭhigatiko sayameva attano vādam bhindati. Ummattakapacchisadisāñhi diṭṭhigatikadassanam. **Manacchatthāni indriyāni ākāsam pakkhandanti** tesam visayabhāvā viya viya vadati. Visayiggahaṇena hi visayā gahitā eva hontīti. **Guṇāguṇapadānīti** guṇadosakoṭṭhāsā. **Sarīrameva padānīti adhippetam** sarīrena taṃtaṃkiriyāya pajjitabbato. Dabbanti muyhantīti dattū, mūḷhapuggalā. Tehi **dattūhi bālamanussehi paññattam**.

Natthidinnasuttavaṇṇanā niṭṭhitā.

6. Karotosuttavaṇṇanā

211. Sahatthā karontassāti sahatthena karontassa. Nissaggiyathāvarādayopi idha sahatthakaraṇeneva saṅgahitā. **Hatthādīnīti** hatthapādakaṇṇanāsādīni. Pacanam dahanam vibādhananti āha “**daḍḍena pīlentassā**”ti. **Papañcasūdaniyam** “tājantassa cā”ti attho vutto, idha pana **sumaṅgalavilāsiniyam** viya tajjanam paribhāsanam daḍḍeneva saṅgahetvā “daḍḍena pīlentassa”iceva vuttam. **Sokam sayam karontassāti** parassa sokakāraṇam sayam karontassa, sokam vā uppādentassa. **Parehi** attano vacanakarehi. **Sayampi phandato**ti parassa vibādhanappayogena sayampi phandato. **Atipātayatoti** padaṃ suddhakattuatthe hetukattuatthe ca vattatīti āha – “**hanantassapi hanāpentassapi**”ti. **Kāraṇavasenāti** kāraṇavasena.

Gharassa bhitti anto ca bahi ca sandhitā hutvā ṭhitāva **gharasandhi**. Kiñcipi asesetvā niravaseso lopo **nillopo**. Ekāgāre niyutto vilopo **ekāgāriko**. Parito sabbaso panthe hananam **paripantho**. **Pāpam na kariyati** pubbe asato uppādetam asakkuṇeyyattā, tasmā **natthi pāpam**. Yadi evam katham sattā pāpe pavattantīti āha “**sattā pana karomāti evamaññino hontī**”ti evam kirassa hoti imesañhi sattānaṃ hiṃsādikiriyā na attānaṃ phusati tassa niccatāya nibbikāratā, sarīram pana acetanam kaṭṭhakaliṅgarūpamam, tasmim vikopitepi na kiñci pāpanti. **Khuranemināti** nisitakhuramayaminā, khurasadisamināti attho.

Gaṅgāya dakkhiṇā disā appatirūpadeso, uttaradisā patirūpadesoti adhippāyena “dakkhiṇaṅcepi”tiādi vuttanti āha “**dakkhiṇatīre manussā kakkhālā**”tiādi. **Mahāyāganti** mahāvijitayaññasadisam mahāyāgam. **Uposathakammenāti** uposathakammena ca. Ca-saddo hettha luttaniddiṭṭho. Damasaddo hi indriyasamvarassa uposathasilassa ca vācako idhāhippeto. Keci pana “uposathakammenā”ti idam indriyadamanassa visesanam, tasmā “uposathakammabhūtena indriyadamenā”ti attham vadanti. **Silasamyamenāti** silasamvarena. **Saccavacanenāti** saccavācāya. Tassā visum vacanam loke garutarapuññasammatabhāvato. Yathā hi pāpadhammesu musāvādo garu, evam puññadhammesu saccavācā. Tenāha bhagavā – “ekam dhammam atītassā”tiādi (itivu. 25). **Pavattīti** yo karotīti vuccati, tassa santāne phalassa nibbattiyā paccayabhāvena pavatti. **Sabbathāti**

“karoto”tiādinā vuttena sabbappakārena **kiriyameva paṭikkhipanti**.

Karotosuttavaṇṇanā niṭṭhitā.

7. Hetusuttavaṇṇanā

212. Ubhayenāti hetupaccayapaṭisedhavacanena. **Samkilesapaccayanti** samkilisanassa malīnabhāvassa kāraṇaṃ. **Visuddhipaccayanti** samkilesato visuddhiyā vodānassa kāraṇaṃ. **Natthi balanti** sattānaṃ diṭṭhadhammikasamparāyikanibbānasampattiāvahaṃ balaṃ nāma kiñci natthi. Tenāha “**yamhī**”tiādi. Nidassanamattañcetaṃ, samkilesikampi cāyaṃ paṭikkhipateva. **Aññamaññavevacanānī**ti tassā tassā kiriyāya ussannaṭṭhena **balaṃ**, sūravīrabhāvāvahaṭṭhena **vīriyaṃ**, tameva daḷhaggābhāvato porisaṃ dhuraṃ vahantena pavattetabbato **purisathāmo**, paraṃ paraṃ ṭhānaṃ akkamanappavattiyā **purisaparakkamoti** vuttoti veditabbaṃ.

Satvayogato, rūpādīsu vā sattatāya **sattā**, pāṇanato assāsanapassāsanavasena pavattiyā **pāṇā**, te pana so ekindriyādivasena vibhajitvā vadatīti āha “**ekindriyo**”tiādi. Aṇḍakosādīsu bhavanato **bhūtā**ti vuccantīti āha “**aṇḍa...pe... vadantī**”ti. Jīvanato pāṇaṃ dhārentā viya vaḍḍhanato **jīvā**ti sāliyavādi ke vadanti. Natthi etesaṃ samkilesavisuddhīsu vasoti **avasā**. Natthi tesam balaṃ vīriyanti **abalā avīriyā**. **Niyatatā**ti acchejjasuttāvutābhejjamaṇino viya niyatappavattitāya gatijātibandhāpavaggavasena niyamo. **Tattha tattha gamananti** channaṃ abhijātīnaṃ vasena tāsu tāsu gatīsu upagamaṇaṃ. Samavāyena samāgamo **saṅgati**. **Sabhāvoyevā**ti yathā kaṇṭakassa tikkhata, kapitthaphalānaṃ parimaṇḍalatā, migapakkhīnaṃ vicittākāratā, evaṃ sabbassapi lokassa hetupaccayehi vinā tathā tathā pariṇāmo, ayaṃ sabhāvo eva akittimo eva. Tenāha “**yena hī**”tiādi. Chaḷabhijātiyo parato vitthārīyanti. **Sukhañca dukkhañca paṭisaṃvedentī**ti vadantā adukkhamasukhabhūbhiṃ sabbena sabbam na jānantīti ulliṅgento “**aññā sukhadukkhabhūmi natthīti dassentī**”ti āha.

Hetusuttavaṇṇanā niṭṭhitā.

8-10. Mahādiṭṭhisuttādivaṇṇanā

213-215. Akatāti samena vā visamena vā kenaci hetunā na katā eva. Kenaci kataṃ karaṇaṃ vidhānaṃ natthi etesanti **akatavidhānā**. Padadvayenapi loke kenaci hetupaccayena nesam abhinibbattitābhāvaṃ dasseti. **Iddhiyāpi na nimmitā**ti kassaci iddhimato devassa brahmuno vā iddhiyāpi na nimmitā. **Animmitā**ti vā kassaci animmāpakā. **Ajanakā**ti etena pathavīkāyādīnaṃ rūpādījanakabhāvaṃ paṭikkhipati. Rūpasaddādayo hi pathavīkāyādīhi appaṭibaddhavuttikāti tassa laddhi. Yathā pabbatakūṭaṃ kenaci anibbattitaṃ kassaci ca anibbattakaṃ, evametepīti āha “**kūṭaṭṭhā**”ti. Yamidaṃ “**bijādito ankurādi jāyati**”ti vuccati, tañca vijjamānameva tato nikkhamati, nāvijjamānaṃ, aññathā yato kutoci yassa kassaci uppatti siyāti adhippāyo. **Ṭhitā**ti nibbikārabhāvena ṭhitā. **Na calantī**ti na vikāraṃ āpajjanti. Vikārābhāvena hi tesam sattannaṃ kāyānaṃ esikaṭṭhāyitṭhitatā. Aniñjanañca attano pakatiyā avaṭṭhānameva. Tenāha “**na vipariṇamanti**”ti. Avipariṇāmadhammattā eva ca ne **aññamaññaṃ na byābādhenti**. Sati hi vikāraṃ āpādetabbatāya byābādhakatāpi siyā, tathā anuggahetabbatāya anuggāhakatāti tadabhāvaṃ dassetuṃ pāliyaṃ “**nāla**”ntiādi vuttaṃ. Pathavī eva kāyekadesattā **pathavīkāyo**. Jīvasattamānaṃ kāyānaṃ niccatāya nibbikārābhāvato na hantabbatā, na ghāṭetabbatā cāti neva koci hantā ghāṭetā vā. Tenāha “**sattannantvevā**”tiādi. Yadi koci hantā natthi, kathaṃ satthappahāroti āha “**yathā muggarāsīdīsū**”tiādi. **Kevalaṃ saññāmattameva hoti**, na ghāṭanādi, paramatthato sattannantveva kāyānaṃ avikopaniyabhāvatoti adhippāyo.

Pamukhayonīnantī manussatiracchānādīsu khattiyabrāhmaṇādīsīhabyagghādivasena padhānayanīnaṃ. **Satṭhisatāni** chasahassāni. “**Pañca ca kammuno satāni**”ti padassa atthadassanaṃ “**pañca kammāsātāni cā**”ti. **Eseva nayoti** iminā “**kevalaṃ takkamattena niratthakadiṭṭhiṃ dīpetī**”ti imameva atthaṃ atidisati. Ettha ca **takkamattakenā**ti iminā yasmā takkikā niraṅkusatāya

parikkappanassa yaṃ kiñci attano parikkappitaṃ sārato maññamānā tatheva abhinivissa takkaditthigāhaṃ gaṇhanti, tasmā na tesam ditthivatthūsu viññūhi vicāraṇā kātabbāti dasseti. **Kecīti** uttaravīhāravāsino. Te hi “pañca kammānīti cakkhusotaghānājjivhākāyā, imāni pañcindriyāni ‘pañca kammānīti paññāpentī’”ti vadanti. **Kammanti laddhīti** oḷārikabhāvato paripuñṇakammanti laddhi. Manokammaṃ anoḷārikattā upaḍḍhakammanti laddhīti yojanā. “Dvāsaṭṭhipaṭipadā”ti vattabbe sabhāvaniruttiṃ ajānantā “**dvatṭhipaṭipadā**”ti vadanti. **Ekasmim kappeti** ekasmim mahākappe. Tatthāpi ca vivaṭṭatthāyisaññite **ekasmim** asaṅkhyeyyakappe.

Urabbhe hanantīti **orabbhikā**. Evaṃ **sūkarikā**dayo veditabbā. **Luddāti** aññepi ye keci māgavikanesādādayo, te pāpakammaṃasutatāya **kaṇhābhijātīti vadanti**. **Bhikkhūti** buddhasāsane bhikkhū. **Te kira** “sacchandarāgā paribhuñjanti”ti adhippāyena **catūsu paccayesu kaṇṭake pakkhipitvā khādantīti** vadanti. Kasmāti ce? Yasmā te pañitapaṇīte paccaye paṭisevantīti tassa micchāgāho. Nāyaladdhepi paccaye paribhuñjamānā ājīvakasamayassa vilomagāhitāya paccayesu kaṇṭake pakkhipitvā khādanti nāmāti vadantīti apare. **Eke pabbajitā**, ye visesato attakilamathānuyogamanuyuttā. Tathā hi te kaṇṭake vattantā viya hontīti **kaṇṭakavuttikāti** vuttā. Thatvā bhūñjananahānapaṭikkhepādivatasamāyogena **paṇḍaratarā**. **Acelakasāvakāti** ājīvakasāvake vadati. Te kira ājīvakasamāyogena ājīvakaḷaddhiyā dalhagāhitāya nigaṇṭhehipi paṇḍaratarā. Nandādayo kira tathārūpaṃ ājīvakaḷapaṭipattiṃ ukkaṃsaṃ pāpetvā ṭhitā, tasmā nigaṇṭhehi ājīvakasāvakehi ca paṇḍaratarā vuttā. **Paramasukkābhijātīti** ayaṃ tesam laddhi.

Purisabhūmiyoti padhānapuggalena niddeso. Itthīnampetā bhūmiyo icchanteva. **Bhikkhu ca pannakotiādi** tesam pāḷi eva. Tattha **pannakoti** bhikkhāya vicāraṇako, tesam vā paṭipattiyā paṭipannako. **Jinoti** jīṇo jarāvasena hīnadhātuko, attano vā paṭipattiyā paṭipakkhe jinitvā ṭhito. So kira tathābhūto dhammampi kassaci na katheti. Tenāha “**na kiñci āhā**”ti. Niṭṭhuanādivippakāre kenaci katepi khamanavasena na kiñci vadatīti vadanti. **Alābhinti** “so na kumbhimukhā paṭiggaṇhātī”tiādinā (dī. ni. 1.394) nayena vuttaalābhahetusamāyogena alābhim. Tato eva jīghacchādubbalyaparetatāya sayanaparāyaṇaṃ **samaṇaṃ pannabhūmīti vadanti**.

Ājīvavuttisatānīti sattānaṃ ājīvabhūtāni jīvikāvuttisatāni. **Pasuggahaṇena** eḷakajāti gahitā, **migaggahaṇena** rurugavayādisabbamigajāti. **Bahū devāti** cātumahārājikādibrahmakāyikādivasena tesam antarabhedavasena bahū devā. Tattha cātumahārājikānaṃ ekacce antarabhedā **mahāsamayasuttavasena** (dī. ni. 2.331 ādayo) dīpetabbā. **Manussāpi anantāti** dīpadesakulavaṃsājīvādivibhāgena manussāpi anantabhedā. Pisācā eva **pesācā**, te mahantamahantā ajagarapetādayo. Chaddantadahamandākinīyo kuḷīramucalindanāmena vadanti.

Pavuṭṭāti sabbagaṇṭhikā. **Paṇḍitopi...pe... uddhaṃ na gacchati**. Kasmā? Sattānaṃ saṃsaraṇakālassa niyatabhāvato.

Aparipakkaṃ saṃsaraṇanimittaṃ sīlādinā **paripāceti nāma** sīghaṃyeva visuddhipattiyā. **Paripakkaṃ** kammaṃ **phussa phussa** patvā patvā kāle paripakkabhāvāpādanena **byantī karoti nāma**. **Suttaguleti** suttavaṭṭiyaṃ. **Nibbeṭhiyamānameva paletīti** upamāya sattānaṃ saṃsāro anukkamena khīyateva, na tassa vaḍḍhīti dasseti paricchinnarūpattā. **Nibbeṭhiyamānameva** suttagūlaṃ **gacchatīti** vuccati. Tañca kho suttapamāṇena, sutte pana asati kuto gacchati suttagūlaṃ. Tenāha – “**sutte khīṇe na gacchati**”ti. **Tattheva tiṭṭhati** suttapariyantanti adhippāyo. **Kālavasenāti** attani veṭhetvā ṭhitam sukhadukkaṃ yathāvuttassa kālassa vasena nibbeṭhiyamāno bālo ca paṇḍito ca paleti gacchati, nātikkamati saṃsāraṃ.

Mahādīṭṭhisuttādivaṇṇanā niṭṭhitā.

11-18. Antavāsuttādivaṇṇanā

216-223. Ekato vaḍḍhitanimittanti ekapassena vaḍḍhitam kasiṇanimittam. **Gāhenāti** lābhī jhānacakkhunā passivā gahaṇena. **Takkenāti** na lābhī takkamattena. **Uppannadiṭṭhīti** “loko”ti uppannadiṭṭhi. **Sabbato vaḍḍhitanti** samantato appamāṇakasiṇanimittam. **Ekamevāti** “ekameva vatthū”ti uppannadiṭṭhi. **Aṭṭhārasa veyyākaraṇānīti** veyyākaraṇalakkaṇappattāni aṭṭhārasa suttāni. **Ekam gamananti** ekam veyyākaraṇagamanam.

Antavāsuttādivaṇṇanā niṭṭhitā.

2. Dutiyagamanādivaggavaṇṇanā

224-301. Dukkhasena vuttanti “iti kho, bhikkhave, dukkhe sati dukkham upādāyā”tiādidukkhasena vuttam. Tādisameva dutiyam veyyākaraṇagamanam. Tenāha “**tatrāpi aṭṭhāraseva veyyākaraṇānī**”ti. **Tehīti** “rūpī attā hoti”tiādinayapavattehi veyyākaraṇehi saddhim. Tanti dutiyam gamanam.

Ārammaṇamevāti kasiṇasaṅkhātāṃ ārammaṇameva. **Takkisaddena** suddhatakkikānaṃ gahaṇam daṭṭhabbam.

Aniccadukkhasenāti “yadaniccam, tam dukkham, tasmim sati tadupādāya evam diṭṭhi uppajjati”ti vuttaaniccadukkhasenāti. **Tehiyevāti** dutiye peyyāle vuttappakārehiyeva. **Tiparivaṭṭavasenāti** tehiyeva chabbāsatiyā suttehi catutthapeyyāle tiparivaṭṭavasena vuttoti yojanā.

Dutiyagamanādivaggavaṇṇanā niṭṭhitā.

Sāratthappakāsiniyā saṃyuttanikāya-aṭṭhakathāya

Diṭṭhisamṃyuttavaṇṇanāya līnatthappakāsanaṃ samattā.

4. Okkantasamṃyuttam

1-10. Cakkhusuttādivaṇṇanā

302-311. Saddhādhimokkhanti saddahanavasena pavattam adhimokkham, na sannitthānamattavasena pavattam adhimokkham. Dassanampi sammattam, taṃsijjhānavasena pavattaniyāmo **sammattaniyāmo**, ariyamaggo. **Anantarāyatam dīpeti** kappavināsapaṭibhāgena pavattattā. Tathā cāha “**tenevāhā**”tiādi. Kappasīsenā bhājanalokaṃ vadati. So hi uḍḍayhati, na kappo, **uḍḍayhanavelāti** jhāyanavelā. Ṭhito kappo ṭhitakappo, so assa atthīti **ṭhitakappī**, kappam ṭhapetum samatthoti attho. **Olokananti** saccābhisamayasaṅkhātāṃ dassanam. **Khamanti** sahanti, ñāyantīti attho.

Cakkhusuttādivaṇṇanā niṭṭhitā.

Okkantasamṃyuttavaṇṇanā niṭṭhitā.

5. Uppādasamṃyuttavaṇṇanā

312-321. Sabbam pākaṭameva apubbassa abhāvato.

Uppādasamṃyuttavaṇṇanā niṭṭhitā.

6. Kilesasaṃyuttavaṇṇanā

322-331. Esoti cakkhusmiṃ chandarāgo. Upecca kilesetīti **upakkilesō.** **Cittassāti** sāmaññavacaṇaṃ anicchanto codako “**kataracittassā**”ti āha. Itaro kāmaṃ upatāpanamalīnabhāvakaravaṇasena upakkilesō lokuttarassa natthi, vibādhanattho pana attheva uppattinivāraṇatoti adhippāyenāha “**catubhūmakacittassā**”ti. Codako “**tebhūmakā**”tiādinā attano adhippāyaṃ vivarati, itaro “**uppattinivāraṇato**”tiādinā. Ariyaphalapaṭippassaddhipahānavasena pavattiyā sabbasaṃkilesato nikkhantattā nekkhammaṃ, magganibbānānaṃ pana nekkhamabhāvo ukkaṃsato gahito evāti āha “**nekkhammaninnanti navalokuttaradhammaninna**”nti. **Abhijānitvāti** abhimukhabhāvena jānitvā. **Sacchikātabbesūti** paccakkhakātabbesu. **Chaḷabhiññādhammesūti** ariyamaggasampayuttadhammesu.

Kilesasaṃyuttavaṇṇanā niṭṭhitā.

7. Sāriputtasamṃyuttam

1-9. Vivekajasuttādivaṇṇanā

332-340. Na evaṃ hotīti ettha “ahaṃ samāpajjāmi”ti vā, “ahaṃ samāpanno”ti vā mā hotu tadā tādīsābhogābhāvato. “Ahaṃ vuṭṭhito”ti pana kasmā na hotīti? Sabbathāpi na hotveva ahaṅkārasa sabbaso pahīnattā.

Vivekajasuttādivaṇṇanā niṭṭhitā.

10. Sūcimukhīsuttavaṇṇanā

341. Tasmīṃ vacane paṭikkhitteti – “adhomukho bhūñjasī”ti paribbājikāya vuttavacane – “na khvāhaṃ bhaginī”ti paṭikkhitte. **Vādanti** dosaṃ. **Ubbhamukhoti** uparimukho. Puratthimādikā **catasso disā.** Dakkhiṇapuratthimādikā **catasso vidisā.**

Āramaārāmaavatthuādīsū bhūmiparikammabījābhisaṅkharāṇādipaṭisaṃyuttā vijjā **vatthuvijjā,** tassā pana micchājīvabhāvaṃ dassetuṃ “**tesa**”ntiādi vuttam. **Tesaṃ tesaṃ** attano paccayadāyakānaṃ. **Tattha tattha gamananti** tesaṃ sāsanaḥaraṇavasena taṃ taṃ gāmantaradesantaraṃ. **Evamārocesīti** attukkaṃsanaparavambhanarahitaṃ kaṇṇasukhaṃ pemaṇiyāṃ hadayaṅgamaṃ therassa dhammakathaṃ sutvā pasannamānasā evaṃ “dhammikaṃ samaṇā sakyaputtiyā”tiādinā sāsanaṃsa guṇasaṃkittanavācaṃ kulānaṃ ārocesi.

Sūcimukhīsuttavaṇṇanā niṭṭhitā.

Sāriputtasamṃyuttavaṇṇanā niṭṭhitā.

8. Nāgasamṃyuttam

1. Suddhikasuttavaṇṇanā

342. Aṇḍajāti aṇḍe jātā. **Vatthikose**ti vatthikosasaññite jarāyupuṭe **jātā.** **Saṃsedeti** saṃsinne kilinnaṭṭhāne uppannā. **Upapativā viyāti** kutocipi avapativā viya nibbattā. **Puggalānanti** tathā vinetabbapuggalānaṃ.

Suddhikasuttavaṇṇanā niṭṭhitā.

2-50. Paṇītatarasuttādivaṇṇanā

343-391. Vissatṭhakāyāti “ye cammena vā rudhirena vā aṭṭhinā vā atthikā, te sabbam gaṇhantū”ti tattha nirapekkhacittatāya adhiṭṭhitasīlatāya pariccattasarīrā. **Duvidhakārinoti** “kālena kusalam, kālena akusala”nti evam kusalākusalakārinō. Saha byayati pavattatīti saḥabyo, saḥacāro. Tassa bhāvo saḥabyatā, tam **saḥabyatam**. Adanīyato **annam**. Khādanīyato **khajjam**. Pātabbato **pānam**. Nīvasanīyato **vattham**. Nīvasitabbam **nivāsanam**. Parivaritabbam **pāvuraṇam**. Yānti tenāti **yānam**, upāhanādiyānāni. Ādisaddena vayhasivikādīnam saṅgaho. Chattampi parissayātapadukkhaparirakkhaṇena maggagamanasāadhananti katvā “**chattupāhana**”ntiādi vuttam. Tena vuttam “**yam kiñci gamanapaccaya**”nti. **Patthanam katvā...pe... tattha nibbattanti** campeyyanāgarājā viyāti daṭṭhabbam.

Paṇītatarasuttādivaṇṇanā niṭṭhitā.

Nāgasamīyuttavaṇṇanā niṭṭhitā.

9. Supaṇṇasamīyuttavaṇṇanā

392-437. Pattānanti ubhosu pakkhesu pattānam. **Vaṇṇavantatāyāti** atisayena vicittavaṇṇatāya. Atisayattho hi ayam **vanta-saddo**. **Purimanayenāti** nāgasamīyutte paṭhamasutte vuttanayena. **Uddharantīti** samuddato uddharanti, pathavantarapabbatantarato pana tesam uddharaṇam dukkameva. **Paṇītatareti** balena paṇītatare, balavanteti attho. **Anuddharaṇīyanāgāti** ānubhāvamahantatāya ca vasanaṭṭhānaviduggatāya ca uddharitum asakkuṇeyyā nāgā. Te “sattavidhā”ti vatvā sarūpato vasanaṭṭhānato ca dassento “**kambalassatarā**”tiādīmāha. Tattha **kambalassatarā dhataratṭhāti** ime jātivāsena vuttā. **Sattasīdantaravāsīnōti** sattavidhasīdasamuddavāsīno. **Pathaviṭṭhakāti** pathavantaravāsīno, tathā **pabbataṭṭhakā**. Te ca vimānavāsīno. Te nāge koci supaṇṇo uddharitum na sakkotīti sambandho. **Sesanti** “kāyena dvayakārinō”tiādīsu yam vattabbam, tam sabbam **nāgasamīyutte vuttanayameva**, tattha ca vuttanayeneva attho veditabboti adhippāyo.

Supaṇṇasamīyuttavaṇṇanā niṭṭhitā.

10. Gandhabbakāyasamīyuttavaṇṇanā

438-549. Mūlagandhādibhedam gandham avanti apayuñjantīti gandhabbā, tesam kāyo samūho gandhabbakāyo, gandhabbadevanikāyo. Cātumahārājikesu ekiyāva te daṭṭhabbā, tappariyāpannatāya tattha vā niyuttāti **gandhabbakāyikā**. Tesam tesam rukkhagacchalatānam mūlam paṭicca pavatto gandho mūlagandho, tasmim **mūlagandhe**. **Adhivatthāti** mūlagandham adhiṭṭhāya, abhibhuyya vā vasantā. Esa nayo sesesupī. **Tam nissāyāti** tam mūlagandham rukkham paccayam katvā nibbattā. Na kevalam tattha gandho eva, mūlameva vā tesam paccayoti dassento “**so hī**”tiādīmāha. **Upakappatīti** nivāsaṭṭhānabhāvena viniyuñjati. **Gandhagandheti** gandhānam gandhasamudāye. **Mūlādīgandhānam gandheti** mūlādīgataavayavagandhānam gandhe, timūlādīgatasamudāyabhūtetī attho. Pubbe hi “mūlagandhe”tiādīnā rukkhānam avayavagandho gahito, idha pana sabbaso gahittā samudāyagandho veditabbo. Tenāha “**yassa hi rukkhassā**”tiādi. **Soti** so sabbo mūlādīgato gandho gandhasamudāyo idha gandhagandho nāma. **Tassa gandhassa gandheti** tassa samudāyagandhassa tathābhūte gandhe. Sarikkham sadisam paṭidānam etissāti **sarikkhadānam**, patthanā. Yathādhippetaphalāni sarikkhadānattāva adhippetaphalam dentu, asarikkhadānam kathanti? Tampi detiyeva puññassa sabbakāmadattatī āha “**asarikkhadānampī**”tiādi.

Gandhabbakāyaṣaṃyuttavaṇṇanā niṭṭhitā.

11. Valāhakasaṃyuttavaṇṇanā

550-606. Lokam vālentā saṃvarantā chādentā ahanti pariyesantīti valāhā, devaputtā. Tesam samūho valāhakadevakāyoti āha “**valāhakakāyikā**”tiādi. **Sītakaraṇavalāhakā**ti sītaharaṇavalāhakā. **Sesapadesū**ti uṇhavalāhakādīpadesu. **Eseva nayoti** “uṇhakarāṇavalāhakā”tiādinā attho veditabbo. **Cittaṭṭhapananti** “sītam hotū”ti evaṃ cittassa uppādanam. **Vassāneti** vassakāle. **Utusamuṭṭhānamevāti** pākatikasītamevāti attho. **Uṇhepī**ti uṇhakāle. **Abbhamaṇḍapoti** maṇḍapasadisaabbhapaṭaḷavitānamāha. **Abbham uppajjati**ti tahaṃ tahaṃ paṭalaṃ uṭṭhahati. **Abbheyevāti** abbhakāle eva, vassāneti attho. **Atiabbhanti** satapaṭalasaḥassapaṭalaṃ hutvā abbhūṭṭhānam. **Cittavesākhamāsesū**ti vasantakālam sandhāyāha. Tadā hi viddho vīgatavalāhako devo bhavitum yutto. **Uttaradakkhiṇādīti ādi**-saddena pacchimavātādīṃ saṅgaṇhāti. **Pakativātoti** pakatiyā sabhāvena vāyanakavāto. **Tam utusamuṭṭhānamevāti** āhārūpajīvīnam sattānam sādharāṇakammūpanissaya utusamuṭṭhānameva. Esa nayo utusamuṭṭhānasītuṇhavātesupi. Tampi hi āhārūpajīvīnam sattānam sādharāṇakammūpanissaya mevāti.

Gītanti meghagītam. **Saccakiriya**yāti tādisānam purisavisesānam saccādhīṭṭhānena. **Iddhibalenāti** iddhimantānam iddhiānubhāvena. **Vināsameghenāti** kappavināsakameghena. Aññenapi kaṇhapāpikasattānam pāpakamma pacca yā uppannavināsameghena vuṭṭhena so so deso vinassateva.

Valāhakasaṃyuttavaṇṇanā niṭṭhitā.

12. Vacchagottasaṃyuttavaṇṇanā

607-661. **Aññānāti** aññānahetu, saccapaṭicchādakasammohahetūti attho. Aṭṭhakathāyaṃ pana imameva attham hetuatthena karaṇavacanena dassetuṃ “**aññānenā**”ti vuttam. **Sabbānīti** “aññānā adassanā anabhisamayā”tiādīni padāni ekādasasu suttesu āgatāni, pañcapaññāsa veyyākaraṇāni vuttāni suttesu pañcannaṃ khandhānam vasena veyyākaraṇassa āgatattā.

Vacchagottasaṃyuttavaṇṇanā niṭṭhitā.

13. Jhānasaṃyuttam

1. Samādhimūlakasaṃyuttavaṇṇanā

662. Samādhikusaloti samādhimim kusalo. Tayidaṃ samādhikosallattaṃ saha jhānaṅgayogena catubbidho jhānasamādhī, tasmā tam tam vibhāgaṃ jānantassa siddham hotīti āha – “**paṭhamam jhāna**”tiādi. Tattha vitakkavicārapītisukhekaggatāvasena paṭhamam pañcaṅgikaṃ, pītisukhekaggatāvasena dutiyaṃ tivaṅgikaṃ, sukhekaggatāvasena tatiyaṃ duvaṅgikaṃ, upekkhekaggatāvasena catuttham duvaṅgikamevāti evaṃ tasmim tasmim jhāne tamtaṃgānam vavatthāne kusalo. **Samāpattikusaloti** samāpajjane kusalo. **Hāsetvāti** tosetvā. **Kallam katvāti** samādhānassa paṭipakkhadhammānam dūrīkaraṇena sahakārīkaraṇaṅca samādhānena samāpajjane cittaṃ samattham katvā. **Sesapadānīti** sesā tayo koṭṭhāsā. Tatiyādīsu navesu akusalopi jhānatthāya paṭipannattā “jhāyītevā”ti vutto.

Samādhimūlakasaṃyuttavaṇṇanā niṭṭhitā.

2-55. Samādhimūlakaṭṭhitisuttādivaṇṇanā

663-716. Dutiyādisuttesu **ṭhitikusaloti** ettha antogadhahetuatto **ṭhiti**-saddo, tasmīṇca pana kusaloti atthoti āha – “**jhānaṃ ṭhapetuṃ akusalo**”ti. **Sattaṭṭhaaccharāmattanti** sattaṭṭhaaccharāmattaṃ khaṇaṃ jhānaṃ ṭhapetuṃ na sakkoti adhiṭṭhānavasībhāvassa anipphāditattā. **Yathāparicchena** kālena **vuṭṭhātuṃ na sakkoti** vuṭṭhānavasībhāvassa anipphāditattā. Kallaṃ jātaṃ assāti **kallitaṃ**, tasmīṃ kallite kallitabhāvena kasiṇārammaṇesu “idaṃ nāma asukassā”ti visayavasena samāpajjitūṃ asakkonto **na samādhismiṃ ārammaṇakusalo. Na samādhismiṃ gocarakusaloti** samādhismiṃ nipphāditabbe tassa gocare kammaṭṭhānasaññite pavattiṭṭhāne **bhikkhācāragocare ca** satisampajaññavirahito **akusalo**. Keci pana “kammaṭṭhānagocaro paṭhamajjhānādikaṃ, ‘evaṃ samāpajjitabbaṃ, evaṃ bahulikātabba’nti ajānanto tattha akusalo nāmā”ti vadanti. **Kammaṭṭhānaṃ abhinīharitūnti** kammaṭṭhānaṃ visesabhāgiyatāya abhinīharitūṃ **akusalo. Sakkaccakārīti** cittīkārī. **Sātaccakārīti** niyatakārī. **Samādhissa upakāradhammāti** appanākosallā. **Samāpattiādīhīti ādi-**saddena sakkaccakāripadādīnaṃyeva saṅgaho daṭṭhabbo catukkānaṃ vuttattā. Tenāha “**yojetvā catukkā vuttā**”ti. **Lokiyajjhānavaseneva kathitaṃ** “samādhikusalo”tiādinā nayena desanāya pavattattā. Na hi lokuttaradhammesu akosallaṃ nāma labbhati. Yadi akosallaṃ, na kusalasaddena visesitabbatā siyāti.

Samādhimūlakaṭṭhitisuttādivaṇṇanā niṭṭhitā.

Jhānasamṃyuttavaṇṇanā niṭṭhitā.

Niṭṭhitā ca sārattappakāsiniyā

Samṃyuttanikāya-aṭṭhakathāya khandhavaggavaṇṇanā.